

東
華
續
錄

東華續錄

臣周潤蕃恭校

乾隆三十四年己丑春正月丙戌免雲南官兵所過地方及永昌等三府州本年額賦其非經過地方免十分之五並免湖北湖南貴州三省官兵經過處所本年額賦十分之三○丁亥命署副都御史傅顯護軍統領烏三泰往雲南軍營監造兵船○戊子命河南光州等七州縣平糶○庚寅諭軍機大臣等緬匪乃藁爾蠻夷朕原無意取彼土地因近年輒敢越境騷擾邊氓始不得已派委兵弁辦理朕意緬匪本無知蠢愚儻畏威悔罪傾心投誠尚可加恩曲宥撤兵停剿今及年餘緬匪雖曾投款並未遣其大頭人前來且書詞多不恭順阿里袞阿桂去歲屢次遣兵毀其卡座擒其

活口並未深入其境痛加懲創是以特遣傅恆前往總理其事阿里衮阿桂均係副將軍而阿桂任兼總督未免分心卽同阿里衮辦事亦屬掣肘著卸去總督與阿里衮同心協助傅恆辦理進兵事宜委軍機章京舒斌齎送副將軍印二顆前往伊等接受後惟辦軍營事務再綠營兵甚屬無用除前調索倫兵二千名外再調索倫吉林兵各一千名遣往著該副將軍等卽將所調湖廣等省綠營兵多爲裁撤並將此際應備辦者妥爲備辦○辛卯諭據鄂爾參奏臺灣總兵王巍於賊匪黃教豎旗焚殺一案措置乖張畏葸退縮且心存諱飾屢次捏報僅將守備劉國樑揭參希圖卸罪請旨拏解質審等語王巍前已降旨革職著卽拏解來京交軍機大臣嚴審定擬具奏守備劉國樑等有應行質訊之處並著鄂爾參遴委妥員一併押解來京聽候審訊○賞吉林索倫兵所過地方

直隸河南湖北湖南貴州銀各十萬兩○以明德爲雲貴總督喀爾喀爲雲南巡撫○壬辰諭軍機大臣等據阿里衮阿桂奏稱海蘭察瑪格等帶領官兵馳赴南底壩侍衛官兵三百餘名馬匹俱已疲乏因擇官兵馬匹較健者二百名率領擒捉設卡賊匪徑襲夏鳩村莊將其三大村莊屋宇悉行焚毀官兵放箭截殺有中箭死者有情急投江者有競渡登舟舟覆落水淹斃者約計不下千名對岸雖有賊匪二千餘名設立壘寨但我兵太少又無船隻因整旅而回等語我兵二百餘名剿戮賊匪千餘海蘭察等因人少無船而回回合機宜然此不過賊匪展放之卡並未直逼賊境烏足使其懾服至所稱行至南底壩馬匹俱已疲乏殊堪駭異彼處之馬皆係發往餵養年餘且阿里衮等復係擇其壯者帶往何以行走五六日卽形疲乏看來伊等不願進兵因故將馬力不及之

處稍帶聲敘以豫爲之地耳今甫行五六日卽至疲乏秋閒進兵止行五六日而已乎彼時將復何以處之此事所關非輕阿里袞從前豈竟未嘗籌辦著傳諭阿里袞阿桂將馬匹何以疲乏若此或南方果係馬匹不宜或餒養官兵辦理不善之處據實明白回奏如謂朕有旨申飭稍存掩飾致貽誤事體之後恐伊等不能當此重罪又據奏稱阿里袞於九月閒親赴龍陵等處關隘指定設卡地方安設兵丁完畢十一月閒官兵始陸續到齊等語朕遣伊等原爲剿賊並非令其防賊設卡等事皆須阿里袞親赴辦理是非剿賊特防賊之侵擾也阿里袞不識事體輕重徒勞跋涉以致耽延時日若然今秋策將安出進兵乎或防守地方乎彼能保賊匪不來乎此事伊等計算如何了結之處著據實奏聞○命撥通倉米二十萬石補直隸霸州等十二州縣賑糶○丁酉命兩廣總

督李侍堯多購阿魏解送雲南軍營辟瘴○庚子諭大學士忠勇公傅恆前往雲南經略軍務今擇於二月二十一日起程所有應行事宜各衙門察例辦理○辛丑以官保署戶部尙書○裁甯夏滿城右翼副都統員缺○裁拉林副都統員缺歸阿勒楚喀副都統轄○癸卯諭吏部彙奏三年內各省甄別俸滿教職佐雜及隨時甄別各員一摺統覈數目雖多寡不等然皆尙有休致斥革之員惟雲南省及河東總河二處總計三年內休致僅各一員在雲南猶屬承辦兵差之時至河東佐雜額缺多至八九十員拮璜在任已及年餘理應悉心激汰何至甄別竟無一人明係膜視察吏姑容瞻徇拮璜著交部嚴加議處○賜經略大學士公傅恆御用盔甲各一○丁未禁通州私立米局○戊申以刑部尙書官保協辦大學士○己酉諭軍機大臣等鄂甯奏臺匪情形一摺吳必

達全不實力督辦甚屬非是吳必達帶兵渡海之初頗似勇往乃一至臺灣竟爾安坐郡城並不親往勦賊提督爲總統大員豈有不身歷行閒親爲調度之理况前此因王巍種種貽誤是以令吳必達前往冀其能妥協經理今該提仍復憚於親身臨陣甯不有鑒於王巍覆轍耶且賊匪僅二三百人而前後所調官兵多至數十倍何難併力克期勦捕乃遷延時日至今毫無措置是吳必達之不知緩急機宜已可槩見卽如摺內所稱劍門坑山徑陡絕僅容一人出入賊匪據險自守等語其地本非賊匪巢穴特因官兵追捕避匿其中斷不能聚積糧食卽果路窄難行賊徒恃以負固豈能不出掠口食在內久聚縱官兵未能奮勇深入獨不能扼其要害使羣賊窘迫就縛乎若賊眾雖據此險別有閒道覓糧延抗又何難訪其路徑腹背夾攻賊雖狡黠又將何往乎且山徑卽屬

險峻並非人迹不到之所賊既能往官兵又何獨不能若賊眾出沒之處官兵竟不能追躡其蹤尙復成何營伍而營中又何必留此庸懦無能之人至於審理匪案交余文儀專辦吳必達責在統兵剿賊又豈可以在郡會審爲詞吳必達平時似覺明練乃辦此數百賊眾竟因循若此則其所謂曉事亦不過全工口給毫無實濟矣吳必達著傳旨申飭仍令將因何不行親剿及捕賊遲緩各緣由明白回奏吳必達旣不督兵剿賊在彼亦屬無用轉恐掣葉相德之肘今予之一月之限若一月限內果能親身督獲正犯則聽其在臺督緝若自度不能不可久延吳必達著卽回伊本任候旨葉相德尙知認真出力所有剿捕賊匪一事卽交其專辦前會降旨令其帶領水師二千前往雲南此時爲期尙早著葉相德卽上緊統兵剿擒黃教等首夥各犯務期剋日竣事再行赴滇其應

派水師前諭葉相德就各營內挑選今伊同至內地尙須時日卽著崔應階如數挑取熟練得力水師分派將弁陸續管領先行發往滇省葉相德隨後起程亦無不可崔應階審辦建甯案件要犯業已就獲亦可速爲審結卽赴廈門駐紮以資調度鄂甯亦卽回省城辦理諸事所有臺灣剿獲賊匪情形崔應階一得有該處稟報隨卽迅速具奏將此並諭葉相德知之○壬子諭朕於二月初六日舉行經筵衍聖公孔昭煥見在來京著令其隨班觀禮○癸丑諭據永瑞等奏南掌國王之弟召翁差遣土目齎稟探聽進兵消息一摺所見固是而於辦理機宜尙未允協已於摺內批諭召翁旣爲緬匪拘留五年今忽遣人探問消息其情形原屬可疑但伊所遣下人卽詳加詰訊豈肯盡以真情吐露正無庸過事吹求惟應告以今年調集各路精兵合力進剿因前此取道木邦錫箔

一路未協地利今欲改由落卓來卡一路統合大兵前往如南掌別有捷徑可通或較來卡等處爲便原可分兵一支令爾國之兵隨同進發但爾國旣志在報仇倚賴天朝聲勢爾國自當輸誠效力計官兵萬餘人及隨營馬匹雖所需日用芻糧自行運帶但旣經爾國地界一應糧餉草料爾等亦須豫爲儲備以資接濟雖官兵斷不騷擾爾地而平價買取亦所必有傳諭之後不妨卽將所遣二人發回不必再行羈留儻該國聞信後仍有回稟遵諭辦理永瑞等至秋閒進兵時亦可由此路領兵數千率同南掌兵丁會合進剿但須諸事留心防察不得稍爲所愚至於進貢一節直當告以南掌素屬恭順屢經入貢如此時果欲進象卽當照往例具表見在所投召翁之稟不便轉奏若另遣爾國大頭目齎奉表文前來卽當代爲奏達如此方與事理允協將此傳諭永瑞五福並

諭阿里袞阿桂知之

二月甲寅朔重修太學

文廟成

御製碑文曰舉江淮河濟以

贊海吾知其不知海舉嵩岱恆華以贊地吾知其不知地然則舉道德仁義以贊孔子者其亦類於是乎夫江淮河濟豈不爲海所納而不足以形海之大然海固不拒江淮河濟以爲水也嵩岱恆華豈不爲地所載而不足以究地之厚然地固不讓嵩岱恆華以爲土也道德仁義豈不爲孔子所垂而不足以盡孔子之量然孔子固不外道德仁義以爲教也教之義始見於虞書而未有定所夏校殷序周庠學則三代共之是國學所昉乎夫三代既有學亦必有教而吾以爲孔子立道德仁義之教者何蓋三代以前之教非孔子不明三代以後之教非孔子不立亦猶江淮河濟非海不納嵩岱恆華非土不載道德仁義非孔子不

垂也國學始於元太祖置 宣聖廟於燕京由元及明代有損益
修葺至本朝而崇奉規模爲大備 列聖右文臨雍心事輪奐乾
隆戊午朕詣學展 先詔易蓋黃瓦聿昭茂典然丹雘雖致飾壯
觀而上棟下宇風雨燥溼歷年既久侵欹是虞爰以歲丁亥發帑
二十餘萬特簡重臣司其事越己丑仲春告蒧工朕親釋奠以落
成焉先是言臣有以乘此時修復辟雍圖水之制爲請者禮官以
爲三代之制弗相沿襲實政不必泥古朕以其言良是遂從之門
殿諸額一準會典皆親書各懸於其所舉大工者必泐碑以誌故
敘其事書之若夫述 孔子之言仍以頌 孔子是猶繪日月星
辰以象天朕有所不能○吏部議奏工部尙書嵇璜於前任河東
總河任內膜視察吏應照徇庇例降調得旨嵇璜著降三級調用
○以程景伊爲工部尙書由吏部左侍郎遷○丁巳釋奠 先師孔子○

己未 上御經筵○諭朕幾餘不自暇逸典學之下時及臨池屢
昔輯石渠所藏前人墨蹟刻爲三希堂墨妙軒二帖廣示藝林復
念古帖流傳可補墨蹟所未備者惟宋淳化閣帖鐫集尤爲美富
遠出大觀太清樓諸本之上但惜初搨與賜者絕尠或云版尋殘
損當時已爲難得後來翻刻愈繁真意喪失有意追摹者未由津
逮內府舊藏淳化閣帖極多而畢士安所得賜本搨最精好茲特
敕選工鉤摹上石冀復舊觀第王著昧於辨別其所排類標題舛
陋滋甚不當聽其沿譌以誤後學因命于敏中等詳加考正以次
呈閱候朕鑒定分識各卷並命蒐採諸家釋文依字旁注其互異
者折衷附記於後以資省覽是於考文稽古之中兼寓舉墜訂謬
之益用嘉惠海內操觚之士焉○辛酉諭歸化城關務歸山西巡
撫轄○乙丑諭向來皇子等乘馬俱用金黃轡皇孫等俱用紫轡

近有因在大內養育與皇子等一體用金黃轡者微覺過分乃又有因分府居外遂用藍色者亦與體制不合宜酌定章程以示區別嗣後皇子等乘馬俱著用金黃轡皇孫等未經朕賞用金黃轡者俱著一體用紫轡皇曾孫元孫等亦著一體用紫色其鞍座各按轡色絲德縣恩俱係長孫著加恩仍賞用金黃轡永遠爲例著交上駟院內務府總管衙門存案遵行○諭馮鈐題參太和縣知縣郭世誼蕩檢不職該管之潁州府知府史魯璠縱庇劣員一疏已降旨將郭世誼史魯璠革職交該督確審究擬矣史魯璠身爲方面大員乃令族叔在所屬署中作幕是其上下通同逢迎挾制諸弊皆所不免此等惡風斷不可不嚴加儆治該撫馮鈐平日豈毫無聞見何竟不早爲查參直待史魯璠告病詳請解任以後始以劾參塞責外省徇庇屬員陋習每遇劣蹟彰著尙欲爲之設法

瓦全卽或知其事萬難掩覆不得已始以一挂彈章藉名整飭而其實不過隱售化大爲小化有爲無之術此種伎倆豈能施之朕前馮鈐近以湖南城工案內不將屬員通融情弊參劾蒙混題銷經部議以降調朕因馮鈐平日辦事尙屬認真特加恩曲貸仍予留任乃辦理此案有意取巧故於事後糾彈冀掩其前此袒庇之咎此而不加以嚴懲則督撫等益以膜視察吏爲得計誰復知所儆畏馮鈐著交部嚴加議處又諭馮鈐見在交部嚴加議處著解任聽候部議所有安徽巡撫員缺著富尼漢補授富尼漢未到任之前其巡撫印務著陳輝祖暫行護理

馮鈐尋革職

○丙寅諭陣亡人

員廕雲騎尉襲次完後仍賞給恩騎尉世襲罔替不准過繼之子

承襲著爲例○以德承爲工部右侍郎

由內閣學士遷

○以朱珪爲山西

布政使調雷暢爲山西按察使以孫績爲山東按察使

由齊東道遷

○

己巳以燿海爲盛京禮部侍郎由奉天府尹遷○壬申賜經略大學士

公傅恆及隨征將士等宴○癸酉轉何逢億爲吏部左侍郎以羅

源漢爲吏部右侍郎由倉場侍郎遷○甲戌實授索琳戶部右侍郎○以

黃登賢爲倉場侍郎由左副都御史遷○辛巳命江蘇上年被水各州縣

平糶○壬午弛洋船帶硫磺入口禁

三月乙酉命伊犁將軍伊勒圖帶索倫兵往雲南軍營賞銀千兩

○丁亥 上親耕藉田○戊子軍機大臣等議副將軍阿里袞等

辦理馬匹不善應革職得旨阿里袞阿桂明德著從寬各留本任

看其如何出力俟軍機告竣再降諭旨○己丑諭軍機大臣等昨

據良卿奏會將黔省地方事務應否移交之處剴商新任督臣明

德覆稱恭膺制篆與兼將軍者不同一切應照舊例辦理等語此

非明德欲急公辦事不過欲辦總督之事而卸軍務之責耳試思

東華續錄 乾隆六十九

軍儲要務與尋常雲貴總督之事孰繁孰簡孰重孰輕正欲傳旨
申飭今日據明德奏到各摺則荒唐之處更多明德向來尙屬能
事何以近日頓不如前殊不可解已於摺內詳細批抹矣如所稱
軍需一切奏銷例應撫臣主臬等語其意竟欲以奏銷重務專談
之於新任巡撫喀爾阿而彼直如置身局外試問明德由滇撫升
授總督屢降諭旨令其專心督辦軍儲自去年至今一切皆其經
手將來銷算軍需非彼之責而誰責乃轉以不敢歧視爲詞豫爲
後日推卸地步是誠何心明德向隨黃廷桂辦事豈竟懵然毫不
記憶黃廷桂當日承辦西陲軍務何等盡心伊竟全然不思效法
尙有何顏面見黃廷桂於地下乎又另摺內稱上年霜降後京兵
前赴沿邊防守其語更屬悖謬殊出情理之外去年調集京兵赴
滇原爲征勦緬匪之用因諸事尙須從長籌備是以暫停進勦並

非爲沿邊防守計且緬匪敢於抗拒天朝不可不整師勦滅以存國體實有難於中止之勢凡具人心者宜無不共知以我堂堂大清時當全盛集中國之力何事不可爲何憚此么廢緬賊而調八旗勁旅遠赴防邊乃明德竟覲顏作此等語恬不爲怪不但毫無羞恥卽天良亦漸滅殆盡矣至於馬匹一項尤爲軍行第一要務滇省見存馬匹餵養已及一年而海蘭察等所騎之馬甫五六日卽已疲乏不堪是伊等全然不以爲事深可痛恨今尙加恩將伊等從寬留任以觀後效此時各省採辦解滇馬騾幾及五萬餘以資秋間進剿之用伊等若尙知畏懼痛自悔悟卽上緊加意飼餵令其一律臚壯以利軍行或可稍贖前愆今閱明德所奏惟以派令提鎮大員督率經理便欲了其餵馬之費竟不議及如何實力籌畫親身董察不致虛糜貽誤如此重務僅責之數提鎮則朕委

任總督何爲至述朕旨阿里衮阿桂不得推諉於彼之語爲自行解免張本獨不思阿里衮阿桂不可諉之明德明德又可諉之彼二人乎總之此事固明德專責萬無可諉卽阿里衮阿桂又豈能輒思卸擔儻仍彼此觀望不知協力同心籌辦妥協豈能逃朕洞鑒伊等卽不能爲身家性命計獨不爲其子孫計乎此次嚴切訓諭之後今秋應用馬匹若再有疲乏貽誤之處伊等三人卽不必復思覓朕矣明德著傳旨嚴行申飭並令阿里衮阿桂一體懍遵並諭經略大學士公傅恆知之○以明善爲內閣學士由給事中遷璜爲左副都御史降調工部尚書○庚寅 上啓鑾幸湯山○癸巳 上幸盤山○乙未以富勒渾爲浙江布政使富松爲廣東按察使由道連○戊戌 上回鑾○庚子 上還京師○乙巳諭吏部議處前任直隸按察使裴宗錫誤給驛站車馬照例議以降調並照該

督原咨將自行查出檢舉之處聲明雙請內閣票擬亦用雙籤今特依補官日降用一籤批發其故不可不明示中外直隸臬司管理通省驛站偶有一二誤應之處原屬無心公過而裴宗錫經朕由府道用至臬司觀其爲人頗可造就尙欲再加遷擢數年來因其母已年老相依官署難於迎養他往是以久留不調今丁憂離任朕之於大小官吏凡遇公過處分多有留任者眾應知之今閱此本則由楊廷璋據按察使呈稱准裴宗錫移咨此明係周元理到任後查出錯誤令裴宗錫補行此文移爲周旋僚友之地而楊廷璋亦附和聲明雙請安得謂裴宗錫自行檢舉耶外省官官相護積習最爲不堪朕方欲力爲整頓豈肯令如此蒙混乎此等尋常公錯若據事直敘在他人尙不至於實降况裴宗錫爲朕所深知又何必爲之顧慮而令其作此趨避是裴宗錫之降實因楊廷

璋周元理等瞻顧使然所謂愛之適以害之也今爲明白宣諭使
內外臣工知朕批閱章疏雖細微節目亦不忽略卽裴宗錫知此
獲譴之由亦必心服而感悔也至周元理委曲敘詳楊廷璋據詳
咨部均屬非是俱著交部議處並將此通諭知之○丙午諭彰寶
見在丁憂江蘇巡撫員缺緊要一時不得其人明德自擢任雲貴
總督以來辦理諸務皆不及從前實力奮勉而於餵養馬匹一事
尤漫無經理因循誤公豈宜令其仍爲總督卽留滇省亦於公事
無益姑念伊前在江蘇於地方情形尙屬熟悉著卽降補江蘇巡
撫以勵後效明德未到任之先巡撫印務著高晉卽速前往蘇州
兼管其雲貴總督員缺仍著阿桂暫行署理○丁未諭察哈爾侍
衛往查牧場水草與章京等兼覈馬匹著爲例○壬子諭軍機大
臣等雲貴總督員缺見已降旨令阿桂暫行署理將來進剿時阿

桂尙須帶兵前往總督承辦軍需諸務最關緊要且彼時或尙有須分路統兵之事必得幹練之人方克勝任因思阿思哈前在烏里雅蘇台辦事一切軍行事宜曾經閱歷且其人尙曉事亦肯實心出力卽欲用爲雲貴總督其河南巡撫員缺令喀爾阿調補雲南巡撫員缺令彭寶前往署理均俟臨時再降明旨見在官兵經過河南正須籌辦阿思哈俟官兵全過豫境卽速馳驛兼程前赴永昌任事所有滇省應辦事務及進兵機宜已節次詳諭經略大學士傅恆阿思哈問之傅恆卽可遵照辦理不必來京請訓計阿思哈起身時總河吳嗣爵當至河南防汛可將巡撫印務傳旨交吳嗣爵暫署以待喀爾阿如吳嗣爵尙未到豫阿思哈卽寄信吳嗣爵令其速至河南接辦阿思哈至期將此傳諭吳嗣爵不必更候明旨至彭寶百日服滿卽令馳驛前往雲南彭寶至雲南然後

令喀甯阿來豫見今舊洱一路唯永瑞五福在彼二人皆糊塗不堪不能獨當一面見諭傳恆於阿里衮阿桂伊勒圖及阿思哈四人內酌調一人前赴舊洱督辦帶兵進剿阿思哈若應派往卽將雲貴總督印務交彰寶兼署令到永昌接應軍營諸務將此先行傳諭阿思哈知之○荊州將軍永瑞雲南提督五福奏報宣慰司刁維屏探得召散在夏蚌地方與召綱相攻未決查夏蚌距孟良四十里此時若取孟良道路開通於秋閒進兵深爲有益臣等擬卽會同副都統雅郎阿總兵永平帶兵往剿得旨爾等此事可嘉但爾等斷未必能勇往辦理

夏四月丁巳以王直望爲山東按察使

由甘肅肅州道遷

○己未諭鄂甯

前在雲貴總督任內辦理軍務俱未妥協是以降補福建巡撫以勵後效昨聞戶牘撤地方去年有被緬匪滋擾之事令阿里衮等

查奏今據奏到則上年二月因額勒登額退兵繞道潛行致尾隨之賊竄入戶腊撒搶掠滋事經副將王振元等稟報鄂甯將此等情形竟敢匿不上聞希圖隱瞞了事其獲罪甚重豈可復任封疆鄂甯著革職賞給三等侍衛銜發往雲南軍營自備資斧效力贖罪此係朕格外加恩鄂甯若尙不知感悔實力奮勉報效必當重治其罪所有福建巡撫員缺著溫福補授溫福未到任之先著卨應階兼署巡撫事務

溫福由署烏魯木齊提督還

○諭吳必達辦理黃教一案

並不親督弁兵上緊剿捕首犯逡巡玩誤殊負委任若竟撤回內地僅照尋常議處轉令其脫身事外無以示儆吳必達著革去提督降補臺灣鎮總兵仍革職留任責令剋期擒獲賊匪以觀後效如再不知奮勉卽重治其罪所有福建提督員缺卽著葉相德補授馳驛前赴雲南軍營辦事其提督印務著崔應階於所屬總兵

內酌選一員奏明署理○傳恆奏三月二十四日已抵雲南詢問緬匪情形專恃木柵抗拒我師向來用尋常槍礮攻取無濟於事臣訪聞茂隆廠一帶有善造大礮之人將來進兵時兵弁各帶銅鐵一斤遇攻柵時隨地暗鑄大礮出其不意自可立破賊寨用過後仍可鎔化攜帶批果破一二大寨亦自如破竹之勢賊望風而散矣又奏臣入滇境後早麥登場晚麥結穗雨水雖不甚霑足旬日內得沛甘霖尙不甚遲得旨京師雨澤係從來未有之霑足卽今每日作陰甚有雨意爲此略慰而思及軍營則實繼念不快也○壬戌 上閱健銳營兵○丁卯諭軍機大臣等據永瑞五福奏稱伊等帶兵二千由普洱起程前至小猛養因通事沈聯奎告稱召綱與召散接戰召散退守孟艮城召綱不能攻取退兵至大猛養土練悉同猛混永瑞等是以由小猛養回至思茅等語召散係

逃往額地滋事要犯前永瑞等奏帶兵由普耳前進朕卽恐其辦理不能決斷故降旨令其務獲方免罪譴伊等未接諭旨以前已經進兵至小猛養又得召散下落自當乘機進取卽伊占據孟良尤應及時擒獲乃永瑞等並未進兵反藉稱外夷言不可信道路不通將兵回至思茅甚屬庸懦無能可恨之至著將永瑞五福革職賞給三等侍衛銜自備資斧效力贖罪並傳諭經略傅恆將伊等調至永昌委用又據永瑞五福奏稱前移付南掌諭文該國深知欣感但該國裝束原類緬夷應造給號衣以便識認等語永瑞等前此何以不行奏聞及降旨詢問尙稱外夷言詞不可輕奏實不可解看南掌如此情形自是誠心助順乘此由落卓進兵會同南掌進攻以分賊勢於正路大兵亦有裨益前經朕降旨於阿思哈伊勒圖二人內派一人督兵由此路前進儻一人不能周備可

令傳諭傅顯協同前往並著傅恆熟籌落卓進兵之處一面奏聞
一面妥辦再永瑞等此奏傳恆雖經路遇以爲尋常事件並未拆
閱故未行夾片將此詳悉傳諭傅恆令其遵辦○諭據傅恆奏稱
賊酋苗溫率賊五百尋覓線墾圍前至毗連我界孟要地方經侍
衛克車德巴朗等率滿兵百餘奮勇攻擊斬首二百餘級生擒賊
匪四名獲馬匹器械無算等語克車德等甚屬奮勉經略傅恆甫
經到彼卽得此捷音可謂順利但克車德等若再奮力前進擒獲
苗溫則愈善矣茲旣退回且休養兵力俟進兵時再悉心籌辦其
隨從克車德等前往官兵著照傅恆所奏分別獎勵至奏請停止
調派猛密雜谷瓦寺兵丁之處似應另有專摺乃反復詳閱卽敘
於陳奏苗溫摺內甚屬含糊可傳諭傅恆再繕摺時務須明晰○
戊辰諭御史孟邵條奏請定翰林編檢額缺一摺所見不知事理

向來所以不限定額者因庶吉士散館之後編檢人員自必較多
中間遇有考試升降其數亦無壅滯之患卽如該御史所奏定以
額缺而所餘各員仍令額外學習候補是有限制之名仍無限制
之實至所稱編檢聽其去來不足以昭慎重等語不知伊等遇有
告假等事資俸例應扣除不能越次遷轉儻其閒有以領俸前後
巧爲趨避者自有定例本難趨避卽令有一二見小不惜顏面之
徒亦將爲士林所不齒國家又何必屑屑爲之防禁耶另摺所奏
佐雜印信嚴禁私雕一事佐雜等官卑人冗所用止係鈐記若悉
令由部頒發事體尤屬紛煩朕意莫若交與各直省督撫於省會
地方定一鐫刻鋪戶如官代書之類令佐雜等報明上司將應用
鈐記卽就官鋪鐫刻但不許懸挂包刻門牌以除陋習其餘市肆
一槩不准私雕已足備稽查而昭信守於事理庶爲允協該部卽

遵諭行○辛未諭軍機大臣等昨據傅恆等奏稱營幕以北野人山頂可得造船木料已令傅顯帶兵一二千名前往修造等語此項兵丁必須滿漢兼派方妥彼處修造船隻若野人稍不恭順卽應立時勦辦此等野人不可深信恐其佯爲恭順陰通緬夷務宜留心籌度再前經降旨著烏三泰在落卓一路進兵已調伊爲成都副都統今傅恆復派令造船則落卓一路須另派一幹練領隊大臣至造船一事朕徹夜思之所關甚要觀所進地圖野人山西北卽係賊人巢穴相距甚近儻野人陰通緬匪來侵有誤船工大有關繫必須重兵駐守方可無虞計今歲於七八月間進兵此山旣距進兵路近瘴氣亦輕莫若移兵屯紮於此以爲聲援九月間想船隻亦可造竣矣如此辦理若何可傳諭傅恆令其察看地勢相度事機熟籌妥議具奏此事甚要朕時廑念也○壬申諭軍機

大臣等傅恆等奏此次大兵由夏鳩水陸並進務須全據江面兩岸其江東猛密地方尤爲緊要得此處可壯夏鳩一路軍威亦可震驚阿瓦至普洱落卓等處尙不甚要請將普洱滿漢兵內調取三四千名會同索倫兵二三千名直取猛密普洱一帶酌留荊州成都滿兵二千名令永瑞沿邊屯紮以爲疑兵等語永瑞等始終辦理不善嗣因疏縱召散業經革職傅恆未知故有此奏落卓等處旣不甚要止須酌派一人督兵以張聲勢南掌雖籲請助順我天朝亦斷不藉外夷兵力致討惟猛密最要卽派阿桂統兵前進傅恆進兵老官屯尤爲緊要著於阿里衮伊勒圖阿思哈三人內酌留一人統兵在老官屯防守將此傳諭傅恆令其遵辦又諭據傅恆等奏稱暫停究辦通賊之漢奸並招致熟識路徑之擺夷以資委用俟大功告成後再行分別賞罰等語所辦甚合機宜前阿

里衮阿桂等辦理攻剿之事並未留心惟圖將就了事反恐嚇於人使皆不敢陳訴究竟未獲一人今傅恆甫到卽如此辦理伊等甯不愧乎著傳旨申飭進兵以前內地貿易者何處不至卽由阿瓦行走亦屬常事傅恆卽向此等民人查詢賊匪情形路徑甚是又據奏稱緬匪謙贊供稱二月間因被戶漢人搶奪遂率三百餘人與戶漢打仗順探大兵信息等語戶漢諒係線變國土司屬人既能搶劫緬匪其勢尙壯而線變國見在何處及可否委用之處可傳諭傅恆令其查辦○諭前以明德餵養馬匹漫無經理是以將伊降補江蘇巡撫其雲貴總督員缺令阿思哈補授見令阿桂暫行署理並將喀甯阿調補河南巡撫彰寶俟百日服滿後前往署理雲南巡撫今據傅恆等奏稱一切軍需皆明德一人經手次第辦有章程恐驟易生手難以遽得端緒請將明德暫留雲南以

巡撫銜辦理總督事務等語明德承辦軍需既難驟易生手而饒
養馬騾乃其專責若遽令其起程前往蘇州轉得以置身事外爲
幸傅恆等所奏亦是著暫署總督俟阿思哈到滇再行交印彼時
亦進兵之時馬騾皆付兵丁亦無藉其料理矣彼時明德即可令
其赴江蘇之任不必留俟軍務告竣僥倖則有功之列至於阿思
哈彰寶平日尙能辦事滇省正當軍行需人之際多得一二人在
彼經理於事更屬有益見已傳諭阿思哈俟官兵全數過豫再行
起程計八月內可至永昌尙可不誤進兵之期彰寶六月二十五
六即可自京起身計中秋後亦可抵雲南阿思哈如有須派往他
處統兵之事彰寶已到亦可署理總督事務河南巡撫已諭令吳
嗣爵暫署喀爾阿侯彰寶到滇後再赴河南新任將此傳諭傅恆
等知之應行轉傳者卽轉傳諭旨○傅恆阿里袞阿桂等會奏臣

傳恆於四月初八日赴騰越龍陵一帶察看邊隘情形並指示添餉馬匹事宜原可卽駐騰越緣永昌爲軍需總匯查辦諸務較便且索倫等兵到滇必須由永昌給馬大駁亦在彼試鑄均須臣親身督辦仍擬往來其閒俟一切辦妥再駐騰越臣阿桂前赴迤西一帶將各廠馬匹稽覈餉養臣阿里衮瘡口未合精神尙好卽與督臣明德於附近永昌一帶查辦馬匹事宜務期一律應壯以濟軍行報聞又會奏敬陳軍營事宜一老官屯爲賊人水陸咽喉今擬於上流蠻蔓要鳩一帶造船進兵時一由要鳩江西取道猛拱猛養直搗木梳一由水路令福建水師順流而下別遣兵一支在江東猛密地方相機剿殺老官屯腹背夾攻不戰自潰一前拘泥避瘴九月後進兵緬匪得計期豫防此次應出其不意先進數十日將來師旋不致遇次年盛瘴更可從容展布一馬匹已由遠及

近遞調沿邊餵養進剿可期應壯惟分馬時先儘大臣挑用火官
員再次兵丁非鼓勵軍心之道今擬分爲三等應壯者分給索倫
次及別項兵丁大臣官員分例本多再次者均勻搭散一火藥鉛
彈照兵丁應得分數給與每致遺失今酌於應得之數十給二三
其餘專員運送隨時接濟向來用竹篾木箱裝貯遇雨輒漏且易
拋散今酌改用牛皮袋一弓箭非綠營所長此次毋庸佩帶箭枝
轉可勻給索倫備用綠營兵飭令多帶鳥槍藤牌刀矛又思短兵
相接用斧亦可而攻斫木柵尤爲得力見飭製三斤重斧酌量配
帶一見寬善鑄大礮工匠先造礮模並帶銅鐵隨時鑄造應用又
多帶劈山五子各大礮均能打遠適用至鳥機等礮徒費扛擡不
濟實用俱不運帶至綠營鳥槍大半堂空口薄止食子藥三錢演
時多在平地臨陣下擊火未發而子已落見按提水槍法令槍子

與槍口脗合閒有小者將黃土樹葉採塞並新造食子藥四錢烏槍分給演習一兵將貴於相習見交提督哈國興查明各歸各伍續到之兵亦各按標營統歸一隊卽有添派別省將領者亦必豫期指派一從前進兵意在緬匪其脅從土司不忍槩誅反致尾擻大兵此次除實在歸誠者收其米石牲畜備首鼠兩端卽行剿滅一見在運貯並各處採買之米共九萬餘石合計調集之兵見給兩月口糧約需二萬五六千石所儲尙有贏餘進剿時口內按站關支口外分領裹帶並多備乾糧便於輕齎速進一永昌順甯所屬十四土司荷戈禦賊原非所長此內或有熟悉賊中徑路及與邊外土司相識者亦擬不拘名數酌帶備用其邊外波竜養子野人擺夷等如有賣心投順者亦可供嚮導之用以上各條酌舉大端未能預定者隨時陳奏得旨覽奏欣慰阿里衮阿桂豈肯如此

用心○癸酉諭崔應階等奏臺灣匪賊黃教被賊夥砍傷竄入諸羅山內至三月二十九日經官兵分路合圍將黃教及匪弟黃芳砍傷擒獲並生擒賊黨七人殺死十三人等語黃教以么麼小竊竄迹荒山本屬不成事體特因文武員弁於發覺之始不能及時悉力追捕以致遷延數月尙爾稽誅及降旨屢經督策方就弋獲是此案身司統領之吳必達等已爲功不掩過無庸交部議敘道員張珽自革職後猶知感奮自效屢經設法追剿此次又擒獲匪首其人尙有天良守備蒲大經首先刀砍黃教頗爲奮勇俱著送部引見其餘在事文武員弁及兵丁等有實在出力應行分別獎賞者並著崔應階查明具奏候朕再降諭旨○丁丑諭刑部議覆廣東省何長子姦污十歲幼女致已母廖氏服毒身死比照婦女與人通姦父母羞忿自盡例擬絞又稱二罪相等從一科斷合依

姦十歲以上幼女雖和同強論律擬絞監候一本擬議甚屬錯謬
何長子之母廖氏因伊子姦汚幼女事敗潛服毒草殞命是該犯
罪不可追全在致母戕生其姦汚幼女一節轉屬罪之輕者該部
乃援此爲定罪正條且比照婦女與人通姦父母羞忿自盡之例
擬以絞候曾不思此例乃指被姦婦女之父母而言與何長子姦
人女而致令己母畏懼自斃者情事絕不相案何得謬爲比附况
定例過失殺父母者卽應絞決誠以爲子而傷親至死雖事出無
心亦不可一息偷生人世若何長子罪案較之過失殺孰輕孰重
不待再計而決也明刑所以弼教此等敗倫傷化之徒不使早正
刑章則所謂弼教者安在且依經定律其理本屬相通春秋著許
世子止之條義例具在特罪其不親嘗藥卽難逃一字之誅刑部
堂官中豈無讀書通義者何竟漫不思省而引斷紕繆若此耶設

以爲該犯之母已死非命不忍復以其子立寘重典此則不明大義庸愚姑息之見司刑者豈宜出此所有此案定擬失當之刑部堂司各官著交部嚴加議處都察院大理寺向惟隨眾畫諾而退有後言至此等敗倫傷化之事反置而不問則何用其會議乎亦著交部察議此本著發還另行覈擬具奏並將此宣諭中外問刑衙門知之○賜陳初哲等一百五十一人進士及第出身有差○傅恆奏臣抵永昌後卽調取從前曾往來阿瓦之人細詢緬地情形據騰越州民寸存福云向因貿易由大南金江西一路到過木梳一路平坦自怕烈而西可通車行又該州民李申功曾於三十一年地方官差往戛鳩江西招降猛拱土司辦理未能妥協查猛拱爲江西擺夷內最大土司將來我兵進勦時如傾心歸化卽可用爲前驅若復觀望渡江後先行勦滅以絕賊人脅從批甚好此

在相機得實不可失人心又不可被人賺又奏據湖廣民鄧清安云緬匪所用戰船約長六七丈每邊安槳二十船頭尾安放礮位旁列鳥槍來往甚快我兵欲破阿瓦非十萬人不可查鄧清安不過見綠營兵豈知我素倫等兵一可當百又批雖然如此亦不可輕彼總以持重萬全爲要又奏據撫夷李經朝稱隴正官性虎踞關外係相沿管理野人之官旣非緬人亦非內地所設加以獎賞卽實心出力隴正官前曾告知布普喇差來賊目云阿瓦若肯差大頭目來降卽當帶至內地賊目覆稱布普喇曾說天朝若差官持文前來就是意在講和可以覘內地兵力阿瓦若先差頭目卽是自形怯懦斷不肯據此則前所稱緬匪不卽差大頭目來恐懼傷害各語均係將就完事之人附會其說去歲緬匪遣兵丁投文竟意在講和我皇上置之不理不與同示仰見先幾獨斷得

旨何謂朕見及此此實 天佑大清國也去歲勤政殿所降旨眾
所共知也非公忠與朕同心之人誰肯爲此說誰敢爲此說今將
所製詩扇寄去見詩如見朕又奏前被緬匪擄去之遮木夷人賴
君選及民人楊廷秀等五人今俱脫回臣詳悉詢問據賴君選供
稱本年正月間緬匪與洞烏起釁搆兵發兵八千打仗使實有其
事將來進剿時緬匪未免顧彼失此亦可稍分賊勢又稱緬匪因
阿瓦城內百姓恐大兵進剿思欲躲避暗令擺夷假作南掌國入
貢以安眾心據此則阿瓦惶惑之狀已可想見得旨看來緬匪今
年當破此皆彼之惡機而我之善機也○戊寅諭軍機大臣等傳
恆奏到各摺已於摺內詳悉批示矣及閱賀丙供詞稱係要鳩舊
頭目賀洛之子伊父見在野人山居住已有數年未見等語賀洛
既係要鳩頭目必深悉該處情形且夷人情性於舊日頭人最爲

依戀自當令賀丙至野人地面尋見其父前往夏鳩招諭該處夷人投順自是極好機會但其地有賊目蓋拉機帶兵千名防守當相機於可遣時再行遣去若賀洛卽行願往不妨卽令前去若夷人果有意投誠卽可令其作爲內應與我兵合力夾攻賊目自無能抗拒因此而收取夏鳩較爲事半功倍夏鳩旣得則後路聲援相續江西一帶便可長驅直進且控扼老官屯上游於舟師會剿亦殊得濟將此傳諭傳恆妥酌辦理○己卯諭嗣後東三省人不
必補綠營官著爲例○辛巳諭覽傳恆查奏附近永昌騰越各土司內惟南甸潞江芒市干崖所屬未遭緬匪蹂躪其猛卯蓋達遮放隴川等處前經竄入焚掠戶口凋敝督撫等竟未奏及此事自劉藻楊應琚等先後措置乖張節節貽誤賊匪遂恃其險遠竟敢抗我顏行國體所關實難中止然去歲所以暫停進兵者以緬首

或知悔罪乞降猶可貸之寬網乃遲待至一年之久逆酋仍然怙惡不遣一人揆之情理斷無可恕因命大學士傅恆前往經略其事於今秋厚集申討以張國威而靖荒服且朕從前所籌慮者沿邊土司與緬賊壤地相接萬一我兵旣撤之後賊或騷擾土司恣其蠶食若因此而令大兵久駐則是以八旗勁旅遠防么膺緬匪成何體制然此不過先事逆料恐其或出於此耳今據傅恆所奏是猛卯等戶口久已被其毒螫則賊匪之不敢侵及騰越永昌邊界者特畏我滿洲兵在彼難以輕犯耳至阿里衮阿桂明德前後到滇於土司切近情形豈竟毫無見聞何緘默不以奏聞使伊等去歲卽令朕知亦可早爲措置矣邊防軍務如此漫不經心阿里衮阿桂明德是何意見著卽明白回奏無識之徒不知此中原委妄疑國家撫全盛之勢準夷回部旣已次第削平何必乘此勝兵

誅及炎徼茲將土司節次被擾不得不用兵進剿之處宣諭中外知之

五月壬午朔日有食之○乙酉諭軍機大臣等據永瑞等奏安南夷目黃公纘等向居南掌猛天寨地方今被黎維禱攻打力不能支率眷屬民人四百餘名懇求內附等語黃公纘等原係安南莫氏之後遁匿南掌境內近因黎維禱往攻窘迫求附但安南恭順素著黃公纘等既係該國之人於理不應允納然伊等見當窮蹙來歸如竟拒而不納又非中朝一視同仁之體朕意此時且令曉事道府大員前往撫諭將來投人等於邊內暫行安置不必告以曾經奏聞如伊等或有不安本分滋生事端者不妨徑行正法示儆至黃公纘等或在安南獲罪逃竄外出黎維禱或係該國王差往拘拏俱難懸定見令軍機大臣擬寫文移一道以明德之意詢

問安南國王其中實在緣起若何俟覆到時再作區處庶於事理允協再南掌前有通信夾攻緬匪之請其情本難憑信今黃公績久居該國猛天寨地方其具稟請附或卽保南掌從中設法嘗試亦未可定著傳諭傅恆一併留心體察妥協辦理或喚彼曉事之阮勵求至永昌問以南掌緬匪情形亦可悉知彼中梗槩並將移文稟及永瑞原摺供單鈔寄閱看○以賓麟爲倉場侍郎由左副都御史
○丁亥諭供鍾上行走宗室覺羅官員等原因祭祀時與侍衛一體執事是以賞戴花翎若奉差外出卽不應戴用乃明善旣派巡漕見有解任質訊之事仍然戴翎殊屬非是著卽拔去嗣後供鍾上行走官員凡遇差槩不許戴用花翎回京供職仍准戴用至文職至三品京堂武職至副都統以上不必兼供鍾上行走著爲令○戊子王勳伏法○己丑諭軍機大臣等昨據傅恆奏稱不必

由普洱一路進兵等語雲南軍營滿洲索倫兵弁雲集昨又派京兵一千兵力充足應或由普洱或由落卓多進一路以分賊勢是以降旨令阿思哈帶兵於此兩路內酌定一路前進傳恆卽派滿洲索倫兵二三千名阿思哈到軍營時令伊帶領前進仍派幹練領隊大臣一員協助令精銳官兵在前哨探如不可進阿思哈等斷不可輕進整兵屯紮但作欲攻之勢以爲聲援若賊因我兵由猛密裏鳩兩路夾攻賊眾盡於此處抗拒落卓一路無賊防守阿思哈等卽乘其不備長驅深入直搗賊巢如略有阻滯仍不可輕敵將此傳諭阿思哈於進兵時務須持重相機辦理萬勿貪功輕進朕意不過欲伊等作爲疑兵以分賊勢非責其直抵阿瓦以成功也其或由普洱或由落卓進攻之處著傳恆定議速奏此次勦辦緬匪賴我兵力無藉外夷南掌助順與否無關緊要但恐伊等

與賊通謀從後抄襲亦不可不豫爲防範著傅恆相度機宜指示
阿思哈遵行○裁江甯副都統員缺○癸巳諭軍機大臣等據阿
里袞阿桂奏稱前永瑞五福等疏縱召散伊等並未咨催自甘認
罪已將伊等交部議處矣但阿里袞阿桂貽誤之事不止於此此
尙其小者也朕命伊二人前往雲南專爲剿滅緬匪以靖地方伊
等自應相度地形賊勢將應辦理之處酌定具奏乃阿里袞諸事
因循阿桂復隨同附和以致諸事均未辦有端緒其意不過住守
一二年緬匪不來卽爲地方無事遂可還京前猛卯等處土司所
屬地方有被緬匪搶掠之處傅恆甫至軍營均經查出具奏而阿
里袞等見在軍營於此等事豈竟不知伊等之意以賊匪不過擾
犯極邊之土司見有滿兵屯紮斷不敢侵犯內地然則卽永駐邊
疆乎抑尙撤回乎我兵撤後賊復內侵又將何以處之阿里袞阿

桂在京時與傅恆同在軍機今雖在軍營何事不提撕訓誨寄信曉諭此次辦理諸事不妥屢經降旨想傅恆至軍營必傳諭伊等斷無隱匿不告之理阿里衮等聞知亦當猛省追悔前非卽應將如何同心協力奮勉辦公之處陳奏方合大臣之體乃二人置若罔聞不發一言惟聽傅恆調度實爲怪事阿里衮阿桂喪心何至於此直是無用之物亦無容多諭緬匪之事究竟應辦與否伊等能辦與否著明白回奏並傳諭經略傅恆知之○諭據傅恆奏遣回鄰省辦差人員一摺所奏甚是已於摺內批示並明降諭旨如所請行矣鄰省道府等官調赴滇省辦差原係阿里衮鄂爾所奏其事本不甚妥協昨會計及此等人員在滇一時旣不能盡得見缺遇有要辦事件必致呼應不靈而各員本任職守轉不免久曠於公事殊屬無益已傳諭傅恆令其酌量辦理今傅恆尙未接到

前旨卽有此奏與朕所見不約而同非公忠大臣實心體國安能
在在留心籌畫恰當如此覽奏實深嘉慰將此傳諭傅恆知之○
傅恆奏接到軍機處詢問解京之緬兵桑寶供內稱從夏鵠到阿
瓦兩岸俱有汊河不能沿江由旱路直達臣等留心體訪如所言
果實進剿時如遇渡河淺則浮渡深則搭橋並撥官兵到處偵探
以防伏賊見距進兵尙有數月進剿道路當再確探奏聞得旨自
應如是留心者○乙未諭軍機大臣等前據永瑞等奏安南國莫
氏裔孫黃公纘率屬投誠一摺會降旨將該夷民暫爲安插並令
軍機大臣擬寫明德移會安南國王文橐一件行文該國王查
明情節咨覆並傳諭傅恆留心體察妥協辦理今據傅恆等奏到
見已行文永瑞將黃公纘送赴騰越詢問並擇地安插居住等語
所奏甚爲允協已於摺內批示卽此可見傅恆之隨事實心經理

若阿里衮阿桂必置之不問矣至黃公纘等窮蹙來歸自應加以撫納卽不令該國王與聞亦無不可但思黃公纘等究係安南屬人而該國王恪守藩服向稱恭順今將此情節明悉傳諭更足昭中朝正大之體於事理尤爲周至所有前次擬有文移自應卽行就近發往諒該國王不敢稍有異說設或不知分量向內地索取投誠之人則竟當駁飭云爾國不能和輯屬人聽其久居外境致令窮迫無依今旣歸誠內附豈得轉因詢問妄思索回殊乖承事天朝之禮且爾國本係藩臣爾之屬人卽與內地編氓無異豈爾之所得專主如此直斥其非該國自益當畏服於安插夷人一事更爲妥協將此傳諭傳恆等知之○壬寅以志信爲左副都御史

由通政使遷

○癸卯諭軍機大臣等前據旌額理額敏和卓奏稱巴達克山之素勒坦沙遣使來云請赴京入覲並稱愛烏罕之愛哈瑪

特沙於來年協助布拉呢敦之子起兵伊力不能支持請助兵一萬伊等業將素勒坦沙妄爲之處痛加駁斥等語奏到時朕曾降旨以素勒坦沙欲請來京不過空談不必阻止伊欲入覲甚善可豐其館穀遣赴京師至請兵一事從前素勒坦沙若將布拉呢敦之子執獻何至復來愛烏罕滋事自貽伊戚天朝豈有助兵之理卽允其請發兵一萬行李資糧又豈素勒坦沙所能供給宜以此等語剴切曉諭遣回旌額理額敏和卓等宜留心妥爲辦理並令隨時覆奏○甲辰諭各省之滿洲蒙古副將五年俸滿來京引見參將七年俸滿引見著爲令

六月甲寅諭軍機大臣等據經略傅恆等奏稱本年及早進兵雖不必待全軍到齊亦必待二三千得力官兵到時方可前進業經行文各隊大臣及沿途地方督撫令其作速催趨等語索倫兵丁

早到誠於事體有益著飛咨直隸總督楊廷璋及河南湖廣貴州雲南各督撫並各起領隊大臣侍衛等將陸續起身之滿洲索倫等兵務設法趨行如各站馬匹不敷卽通融折價料理惟期進行無誤並將如何設法料理迅速前往之處卽行奏聞此次進兵傅恆等一切籌畫甚周自應照所奏相機辦理惟摺內奏稱與其由夏鳩取路進發不若就近由蠻暮進剿奪取新街渡口賊匪如仍守夏鳩我兵攻克新街斷其路徑遣一旅之師卽可殲滅等語如此進兵雖云近便但夏鳩地方究在我兵後路儻猛拱賊眾與之句通亦甚可虞不可不留心防範諒傅恆等已見及此而摺內未經聲敘故論及之○丙辰諭錢謙益本一有才無行之人在前明時身躋撫任及本朝定鼎之初率先投順忝陞列卿大節有虧實不足齒於人類朕從前序沈德潛所選國朝詩別裁集曾明斥錢

謙益等之罪黜其詩不錄實爲千古立綱常名教之大閑彼時未經見其全集尙以爲其詩自在聽之可也今閱其所著初學集有學集荒誕背謬其中詆謗本朝之處不一而足夫錢謙益果終爲明臣守死不變卽以筆墨騰謗尙在情理之中而伊旣爲本朝臣僕豈得復以從前狂吠之語刊入集中其意不過欲借此以掩其失節之羞尤爲可鄙可恥錢謙益業已身死骨朽姑免追究但此等書籍悖理犯義豈可聽其流傳必當早爲銷毀著各該督撫等將初學有學二集於所屬書肆及藏書之家諭令繳出彙齊送京至於村塾鄉愚僻處山陬荒谷者並著廣爲出示明切曉諭定限二年之內俾令盡行繳出毋使稍有存留錢謙益籍隸江南其書板必當尙存且別省或有翻刻印售者俱著該督撫等卽將全板儘數查出一併送京勿令留遺片簡朕此旨實爲世道人心起見

止欲斥棄其書並非欲查究其事所有各書坊及藏書之家原無干礙各督撫務須詳悉諭知並飭屬員安靜妥辦毋任胥役人等藉端滋擾若士民等因此查辦反以其書爲寶不行舉出百計收藏者則是其人自取罪戾該督撫亦不可姑息若將來犯出惟該督撫是問其京城地面著提督衙門五城順天府一體辦理將此通諭中外知之○諭各省學政舉報優生會同督撫考覈○己未諭前據崔應階奏報臺灣賊匪黃教等已就殺獲一摺隨傳諭崔應階將在事之文武員弁勦殺賊匪實在情形逐一查明據實具奏至所稱革職千總萬其堯把總吳化龍等俱能直前殺賊之處彼時卽疑提鎮等或因該弁已經褫革輒思乘獲賊之時爲伊等贖罪地步亦不可定並令該督確查今據崔應階奏稱據臺灣道蔣允焄稟覆在臺文武俱係買綫緝捕有守備蒲大經千總聶世

奇購得熟識黃教之民人鄭純周寅進山將黃教殺死經文武驗明擡回黃芳一犯亦係夥匪蘇彩龍等在山後帶傷擒獲其文武官兵止有堵截圍困之力並無當場殺獲之功至萬其死吳化龍陳元璋等並未親手砍殺擒獲各等語是其僥倖冒功果不出朕所料緣旗欺詐一至於此當朕正在整飭之時尙敢貪功罔上實堪駭異吳必達等統兵剿賊並不實力奮勉剋期竣事已屬咎無可逭乃於奏報獲賊時又爲革弁冒陳功績直是喪盡天良非降留薄懲所可示儆吳必達卽著革職令其自備資斧往雲南效力余文儀尙爲刑部司官尙能辦事且係文職著從寬革職以刑部員外郎用仍帶革職留任俟十年無過再予開復葉相德見在派往雲南軍營著革職仍留提督之任自備資斧在滇帶領水師以觀後效仍交經略大學士傅恆留心察看如該提督尙不感奮出

力卽奏明以軍法從事副將戴廷棟首先捏飾稟報尤爲此案罪魁著革職發往雲南在水師隊內行走自備資斧效力贖罪如仍前不知悔改卽以軍法從事崔應階前次不加詳覈據稟率報雖有應得處分今旣據實覆奏所請交部察議之處著加恩寬免朕於臣工功罪大小輕重悉視其所自取不肯令有絲毫屈抑亦不容其稍涉倖免此臨御三十四年以來所可自信亦天下臣民所當共信者至於批覽章疏並非豫存逆詐億不信之成見而其中略有情僞自難掩覆所謂物來畢照實亦先覺之出於自然者如此案一經指詢其虛飾之迹果無遁形又如湖南巡撫方世儔查辦傳布謠詞一案竟欲歸之已故之李文有顛倒了事及傳諭該撫確切根究則展轉傳寫之犯及知縣陳夢湘隱飾教供諸情節無不水落石出可見虛僞之端實爲天理所不容天理所不容

卽不能逃朕之照鑒朕非欲自矜明察而挾情虐理自皆歷歷不爽則弄巧罔上者徒自取罪而總不知朕實心愍之所有崔應階各摺及從前廷寄並著發鈔將此諭令中外知之○以孫孝愉爲福建按察使

由汀漳龍道遷

○辛酉諭軍機大臣等據經略傅恆等奏稱

詢問木邦線襁團據稱屬下戶漢足可招集千人請酌賞口糧火藥當奮力殲剿緬匪情詞懇切因曉諭線襁團令其將伊屬下盡數招集赴腊戍擒拏苗溫辦理完竣時各處戶漢必有聞風而至者再招集由落卓一路前進更爲妥協見已曉諭遣回等語線襁團原係木邦土司爲緬匪殘擾情願將所屬戶漢等招集自效傅恆等卽將擒拏苗溫一事責成辦理甚合機宜卽照所奏酌賞口糧火藥令其前往但不可僅派伊屬下人等仍應添派我兵線襁團究係外夷不可深信恐苗溫就縛以擒獲渠酋恃爲己功妄生

希冀見在軍營兵數頗多普洱一路並不進兵不過在彼駐紮防守無庸三四千兵卽由普洱兵內派出二千名備相距較遠礙難撥調卽著於軍營兵內抽撥一二千派往亦妥除派傅顯統領外仍由烏三泰長青五福三人內派一人協同前往再普洱紆遠是以不由此路進兵不過屯兵防守有雅郎阿鐵保在彼毋庸另行派人前往卽查拏召散之事亦非急務大兵攻得阿瓦傳檄可得伊將焉往又據奏稱大功告成後派之師查按來卡落卓等處彼時令普洱之兵接應夾攻卽可將零星賊匪剿除淨盡肅清道路所議亦是彼時大功已成儻道路不甚遙遠竟遣阿桂統兵前往將此路按查並順便留心查拏召散將此傳諭經略大學士傅恆等相機酌辦又據奏稱猛拱人等急欲辦賊索倫兵已到數百名再合見駐之兵數千名先奪取夏鳩渡口此雖相機措置以期及

早成功但既得一見成機會仍須堅定熟籌方妥不必過於急切
傅恆惟遵前旨諸凡持重妥辦再昨據良卿奏稱貴州提督拜凌
阿經經略傅恆等檄調前往永昌朕卽降旨飭查傅恆等並未奏
聞可傳諭令其查奏○傅恆等奏提督哈國興自野牛壩來騰據
稱該處樹木甚多內畫楠夜槐二種尤爲適用見在砍伐將及二
千株每日督工趕造船隻約於指定數目外更可多造該處氣候
甚好兵役並無疾病無不欣喜從事得旨欣慰覽之○乙丑諭梁
鵠鴻不宜漕運總督之任傅顯著補授漕運總督伊見在出差著
黃登賢前往署理倉場侍郎事務卽著梁鵠鴻署理○諭各省分
發舉人需次遲速不齊各就鄰省分撥俾益疏通○戊辰命各省
鑄化小錢○己巳倉場侍郎寶麟等奏據都統官保奏稱興平倉
米色潮潤遂親赴查驗米色微潮久貯恐致虧缺應於本年內甲

米搭放再今年江浙米色俱未純淨因各幫遠涉江河未便駁回飭令風晾入倉得旨依議此項廩米潮潤皆由梁翥鴻辦理不善所致從前楊錫綬任內並無似此者卽有因被災米色不純亦必奏聞今米石既有灰暗潮溼過淮盤驗時梁翥鴻因何輒行轉運並不奏聞亦不將該省收兌之官查參或當時尙屬純淨而旗丁等沿途偷換攙雜亦未可定然總因梁翥鴻不能實力查察實難辭咎著交部嚴加議處竇麟黃登賢等既經驗明米色微潤溼氣薰蒸卽應參奏辦理乃竟率行收倉直至官保查出奏聞尙以各船遠涉江河未便按幫駁回爲詞亦屬不合竇麟黃登賢並著交部察議尋議上得旨梁翥鴻著降三級調用竇麟黃登賢俱著降一級從寬留任○壬申傅恆等奏鑄工匠見已熟悉本月初五日製得大墩一位用銅二千餘斤中安大鐵子一重十六兩半子

十餘各重二兩豎立木柵約三里外安礮施放礮子直衝木柵復
迸散山石入土五六尺若將模子略放卽三千斤重礮亦屬易辦
查鑄礮先分節作成泥坯模子臨時將模子對縫埋入土坑然後
灌入銅斤閱三時礮身可就土坯必俟自乾不可火烘又中間所
用鐵桿亦須豫造用時將官員兵役分帶銅斤立時鎔化卽可成
鑄礮身熱退約須二日掘取土坑以及鑽打火門統不過四五日
卽對敵施放無論水寨輒城無不應手立破得旨欣慰覽之○乙
亥諭據傅恆奏野牛壩地方製造戰船板料檣桿等物七月內俱
可完竣將來運至河岸擬營兵與滿洲兵丁更換擡運卽跟隨之
家奴等亦令分派輪擡一摺所辦甚是他人斷不能似此已於摺
內批諭矣滿洲兵騎射素嫻進剿時自宜資給馬力至於習勞之
事則與綠營兵丁旣同隸行閒原不應區分彼此向特因綠旗惡

習惟怯無能臨事每多退避是以有犯必懲若其服役辛勤當與滿洲兵一體愛惜以均其勞逸前此領兵大臣惟知體恤滿洲而於奔走服役專派綠營不復念其勞勩豈一視同仁之道今傳恆於運送船料令滿洲兵輪流乘騎分擡不使綠旗偏於勞瘁並以大臣官員跟隨之家奴等皆乘馬安行於理未協亦一例分派輪擡籌辦實爲公當綠營兵丁稍具天良有不知感激奮勉願爲國家出力者乎此實從來所未籌及自非公忠體國與朕同心之大臣豈能酌理揆情均平安協若此凡有領兵之責者皆當奉以爲法傳恆如此存心必蒙上天所垂佑迅奏膚功自可豫卜朕心深爲嘉悅至於造船一事水陸並進爲征緬最要機宜乃朕屢次詢問而阿里袞鄂甯阿桂等並以該處崖險澗窄難行船爲辭卽朕今年特派傅顯烏三泰前往專辦此事亦以沿江一帶實無

造船處所覆奏及傳恆旣至永昌卽遣人往勘則於銅壁關外野
牛壩地方卽得可以成造船隻之處樹木旣足供船料且氣候涼
爽可以屯聚兵匠而野人又極恭順服勞無異內地編氓同此沿
邊地壤非自今日始通何以前此竟無一人見及而傳恆得之竟
爾便於取攜可見事無難易人果專心致力未有不成者無如諸
人皆豫存畏難之見於胸中遂以爲隔閼不可行以傳恆今日所
辦觀之向所謂斷難籌辦者然乎不然乎傳恆摺著譯漢發鈔並
將此宣諭中外知之○傳恆等奏據差往老官屯偵探之獲夷金
襖稟稱由虎踞關至老官屯並無緬匪攔阻惟老官屯江邊離去
年舊柵三四里又立一柵共計三層內用輟砌中間排立大木外
層加築土牆周遭空濠寬二丈深如之前開一門搭有弔橋後門
通江四隅築有墩臺高與柵等柵內有賊四百餘江內有空船二

十餘隻夜間敲梆鳴鑼防範甚嚴等語查老官屯爲水路扼要賊
搆我兵必仍照上次專由旱塔進攻故防範倍密今擬攻其不備
臨時先遣兵一支由新街渡江搆其西岸之柵批此是勝著又奏
並令蠻暮船隻順流而下奪其江內賊船或潛分輕兵一隊繞過
老官屯木柵在下游斷其歸路使賊人知阿瓦之船不能往來自
驚惶思竄雖堅柵可不攻而破得旨爾等所鑄大礮亦足攻破矣
○定參處州縣並議處守巡各道例○以富察善塘古泰俱爲內
閣學士富察善由內閣侍讀學士塘古泰由給事中遷○戊寅湖北黃梅縣江隄決命吳
達善揆義勘之○庚辰諭諸王等遇齋戒日期俱在紫禁城內住
宿

東華續錄

乾隆七十

臣王先謙敬編

臣周瀚蕃恭校

秋七月丁亥諭軍機大臣等據傅恆等奏請將明德暫留雲南協同阿思哈辦理軍務所奏甚是明德係辦理軍需熟手前已傳諭令其俟阿思哈帶兵前進仍令明德署理督篆留永昌照料策應矣見據阿思哈奏報已於六月二十六日起程計八月望前即可至永昌接受總督印務河南巡撫亦屬緊要吳嗣爵以總河兼署恐屬員等未免觀望因循喀甯阿著仍遵前旨俟阿思哈到滇卽將撫篆交明德署理速赴河南新任見在傅恆奏於七月二十日起程赴野牛壩等處督辦一切今索倫吉林等處官兵次第到滇福建水師七月內亦可抵軍營約計八月中卽當合兵進剿彼時

銅壁關外一帶必須大員駐兵接應著阿思哈於新街營暮旱塔適中扼要之地帶兵駐守籌辦前後策應機宜其總督印務交明德署理明德卽當移駐騰越經理一應軍務彰寶見在起程計其時亦可到永昌接受撫篆任事如此則內外聲勢更覺聯絡於進剿諸事更爲有益阿思哈明德彰寶俱係國家大臣同辦軍旅重務總宜合力齊心不分畛域將此一併傳諭傳恆等知之○○瞭善以屬員疏脫重犯不行詳揭革職以姚成烈爲安徽按察使由江安道○戊子 上奉 皇太后啓鑾秋獮木蘭○免經過地方本年額賦十分之三○辛卯諭軍機大臣等傳恆奏據線官猛來騰越稟稱老官屯賊目諾爾塔經賊匪情較調回阿瓦城約止留兵五百把守將夏鳩之賊眾由水路全行撤回又奏稱有猛密土司遣人來稟情願內附等語此係最好機會夷人性愚多疑伊等地方

又與緬賊毗連若我兵少無進剿之意自不無觀望或揚言內附
緩我之師均未可定今見大兵進剿緬匪卽日殲滅伊等可永享
太平輸誠內附情勢所有並無可疑且老官屯賊兵止留五百看
來緬匪被野養子擊敗之語亦屬不誣我兵前進背後既無可慮
夾攻老官屯亦屬不難矣前經降旨令傅顯由木邦進發今據線
官猛所稟伊屬下戶漢等已將猛尾地方收稅之緬賊搶掠苗溫
已經回去是木邦一路已無賊匪不必以得力之兵往無用之地
傅顯著在大隊內行走奮勉立功今猛密已得進攻自易若直取
阿瓦城仍宜留心謹慎阿桂務隨同經略傅恆前往至老官屯猛
密司等處收服之後宜留大員駐紮老官屯著伊勒圖防守猛密
司等處留傅顯防守揀幹練總兵一員協助再懽駁此時勢甚窮
蹙尙有歸順之意伊屬下頭目四人不從情殊可惡傅恆進兵時

務將此四人擒獲勿致免脫再攻取阿瓦城後彼處夷人部落甚多我大臣等未便駐紮若另授緬王必擇能辦事務可守地方之人方爲妥善再傳恆前奏所造之礮用後復行銷毀等語今見有船隻若得老官屯時即將船載往不必銷毀將此傳諭傳恆等遵照此旨到時諒已進兵一有捷音卽速奏聞○諭據李侍堯奏到查訪暹羅國情形一摺看來詔氏子孫式微已極大勢俱爲甘恩敕所占難復望其振作亦止可聽其自爲蠶觸原不必藉其力亦不必爲辦理也見將該督所奏原摺及莫士麟原稟圖說鈔寄傳恆閱看所有前寄李侍堯檄諭暹羅國文一道原令該督如果暹羅係詔氏後裔恢復自當寄去今該處旣爲甘恩敕所占卽毋庸覓便寄往其原擬檄諭稟底可且留廣東如該鎮目莫士麟有續行稟報之處或甘恩敕有覆該督去歲檄諭之文仍著速行據實

奏聞將此傳諭該督知之○設巴顏岱城領隊大臣一○甲午

上奉 皇太后駐蹕避暑山莊○丙申諭軍機大臣等揆義自擢任巡撫以來於地方事務並未見有實力整頓之處其屢次陳奏不過僅以尋常糾劾屬員具摺塞責按之總無實際且聞其前在江西藩司任內不甚妥協恐其於巡撫不能勝任或並有劣蹟亦未可定會諭吳達善令其密行查察據實奏聞近於盜犯龔在山一案揆義初奏稱係廣濟縣知縣劉長靈差役追至懷甯縣地方被捕役盤獲而富尼漢則奏係安省千總王光國在桐城縣盤獲因兩人所奏不符隨降旨傳詢揆義始以廣濟縣所稟係差役得信於懷甯捕役告知獲盜情由而富尼漢咨文內原有千總王光國督同兵役擊獲之語前奏失於查敘等語奏覆是其前奏並非詞語含混實係有心取巧豈得以糊塗竊率自解見已交部嚴加

議處看來揆義經朕加恩委任封疆尙如此取巧則伊爲藩司時必有不實不端之事前曾聞揆義在江西與建昌府知府黃肇隆最爲親密黃肇隆倚恃聲勢任意妄行甚至一切舉劾黃肇隆皆從中干預頗滋物議吳紹詩當時並未奏及或爲此二人所愚後雖自行覺悟不加聽信然亦未將黃肇隆參劾業經傳諭吳紹詩令其將黃肇隆平日居官劣蹟確查參奏何至今尙未見奏到著再傳諭吳紹詩將揆義在藩司任內居心行事若何及與黃肇隆如何交接往來有無實在款蹟卽行慎密訪查據實迅速覆奏若該撫仍存瞻徇同官之見稍爲隱飾或因向日未經參奏尙思迴護前非則是吳紹詩自取罪戾不能復爲曲貸矣○諭烏里雅蘇台缺額馬匹取哈薩克馬匹填補著爲例○戊戌諭禮部尙書董邦達久直內廷奉職勤慎前以衰病乞休特加恩給假調理以冀

漸痊今聞瘧逝甚爲軫惜所有應得卹典該部察例具奏尋子祭葬諡文恪○諭前聞建昌府知府黃肇隆有倚恃上官任意妄行之事因傳諭吳紹詩查明具奏今據該撫參奏黃肇隆果有倚勢縱恣聽用家人藉端索詐並需索屬員逢迎上司各款請旨革審等語黃肇隆著革職交總督高晉與案內有名人犯一併嚴審究擬具奏至揆義於盜犯龔在山等一案以安省盤獲之犯攘爲湖北盤獲有心捏詞取巧已降旨交部嚴加議處今據查揆義在江西藩司任內待黃肇隆甚優升任後黃肇隆尙有餽送優人之事則其平日與屬員交結不知檢束已可槩見豈可復任封疆重寄揆義著解任來京候旨吳紹詩身任巡撫屬員劣款纍纍不能先事查劾經朕傳旨詢問始行據實參奏所爲察吏者安在吳紹詩著交部嚴加議處○己亥調陸宗楷爲禮部尙書蔡新爲兵部尙

書以吳紹詩爲刑部尙書海明爲江西巡撫劉益爲四川布政使

阿揚阿爲四川按察使

由郎中遷

○以梁國治爲湖北巡撫調陳輝祖

爲江甯布政使以范宜賓爲安徽布政使

由太常寺少卿遷

○辛丑諭月

選州縣官掣籤後告病者附下月引見下次未痊卽行開缺至遇

巡幸前兩月託病不卽引見冀歸下月驗放者卽扣除開缺將來

另選得缺仍著引見著爲令○壬寅召程燾來京以顏希深爲江

西布政使○丙午諭軍機大臣等據傅恆奏見擬七月二十日帶

兵四千餘名從夏鳩過渡由猛拱陸路前進直抵蠻暮西岸占據

渡口等語所辦甚合機宜但經略重臣統兵進剿軍聲必須極盛

更可震懾邊夷今所帶僅四千餘名雖俱係精練勁旅所向自能

得力但爲數無多恐尙不足以張聲勢著傳諭明德將未到官兵

卽速催令兼程邁進照原定經略一路統兵九千三百名之數陸

續趕赴軍營毋得稍有延緩見諭令伊勒圖在騰越等候續到官兵帶領前進明德於官兵續到永昌時一面催趙遄行一面通知伊勒圖妥協辦理仍將官兵續進日期迅速奏聞此旨到日計阿思哈亦已至永昌並著傳諭會同遵照辦理並將此諭令傅恆知之又諭傅恆等奏據猛拱頭目脫猛烏猛等稟稱賊匪情駁已於四月十五日身死見議立子弟未定一切事俱賊目雷迴步管理今臣等因乘機進兵等語賊匪身死如果屬實此 上天眷佑賜一機會更不難集事傅恆等渡過戛鳩由蠻暮西岸進兵甚合機宜賊匪死後立子立弟一得信息卽速奏聞傅恆等務將賊匪族黨擊獲解京勿致漏網惟是傅恆係天朝經略大臣止帶兵四千餘名體統未稱著諭明德等催趙各隊兵前進必足九千三百之數令伊勒圖帶領趕赴接應戛鳩地方雖無賊匪亦必當防守卽

著伊勒圖派兵駐紮傅恆等攻克老官屯伊勒圖卽調駐老官屯
另派人防守夏鳩總在計出萬全毋稍疏忽見在情形速行奏聞
將此傳諭傅恆明德等知之○丁未彗星見○諭傅恆奏總理糧
運事務大臣傅顯在野牛壩地方染瘧身故等語傅顯在軍營辦
理造船事宜頗屬奮勉茲聞溘逝深爲悼惜所有應得卹典該部
照例給與伊子服闋後著軍機大臣帶領引見尋予祭葬諡襄勤
○戊申傅恆等奏七月初十日賀丙同猛拱大頭目脫猛烏猛等
來至騰越稱我兵在野牛壩造船緬子早有見聞恐於蠻蕃西岸
設伏滋擾臣等察看形勢須派兵數千從夏鳩過渡由猛拱陸路
直抵蠻蕃西岸占據渡口俾東岸造船官兵得從容集事一面令
脫猛烏猛等先在夏鳩豫備渡船臣傅恆領見到之兵於二十日
自騰越啓程分撥兵千餘名安設夏鳩一路臺站臣阿桂亦於二

十日啓程前往野牛壩督理造船事務至脫猛烏猛等見在投誠臣等另寫曉諭該土司檄文卽令其齎往至結些與緬匪係屬舊仇臣等並寫曉諭結些土司檄文令猛拱差人寄往得旨覽○己酉揆義以緝盜攘功革職

八月辛亥諭軍機大臣等見在經略傅恆統兵由夏鳩進發阿里袞阿桂前往野牛壩辦理阿里袞身常患病性又樸實見事稍遲阿桂心細而敏捷伊二人同在一處雖陳奏事件阿桂名次在後所有諸事主見決斷朕皆責成阿桂當竭力抒誠妥協爲之儻若不肯盡心貽誤軍務朕必重治阿桂之罪斷不稍加寬宥昨夜念及於此故特傳諭阿桂並傳諭傅恆知之○乙卯諭期成額見在出差裨克托著專署兵部侍郎其刑部侍郎員缺著伍訥璽補授○丁巳諭前者朕五十誕辰恐直省臣民有起經壇立碑亭貢獻

稱祝之事或致糜耗物力曾豫敷禁止之明年八月居朕六十正
誕意中外耆庶必有以遇甲聖節非五旬大慶比欲申祝釐以抒
愛戴者情固難卻而非朕心所樂從用是明切宣示朕臨御三十
四年以來承累洽重熙之盛海宇乂甯民氣恬樂復仰荷 上蒼
眷佑連歲屢豐方思上答 鴻庥宏敷愷澤以嘉惠吾民益臻熙
阜國家之瑞莫大於此且越歲辛卯卽恭遇 聖母皇太后八旬
萬壽 璇闈慶典亙古稀逢朕將率天下臣民臚歡舞綵敬迓
慈禧自當聽衢巷謳歌共展尊親之義又何必因朕躬慶辰頻年
祝嘏多此繁文縟節爲哉其布告天下咸體朕意一切仍遵二十
四年所降諭旨不必舉行各省督撫亦不必以來京叩祝爲請並
不必進奉珍玩及綉段表裏等物至在籍大臣中如尙書沈德潛
壽屆期願錢陳羣亦年逾八表不宜復以遠涉勞筋力已諄復傳

諭令其毋庸親詣京師叩祝俾黃髮耆臣領袖江鄉父老攜杖呼
嵩爲熙朝盛事不亦美歟著將此通行傳諭知之○庚申裁庫車
地方綠營都司守備及印務處辦事章京各一員○甲子賜巴顏
岱城名曰惠甯門東曰昌彙西曰兆豐南曰遵軌北曰承樞○乙
丑 上自避暑山莊巡幸木蘭行圍○己巳諭據崔應階奏參革
興泉永道蔡琛羈禁司監自縊身死一摺殊堪駭異蔡琛以監司
大員恣意貪婪贓私繁縟爲國法所必誅旣經定罪入本年秋審
情實自應嚴加監禁乃竟令其自縊不得明正典刑實屬不成事
體司監寬縱若此則州縣獄禁尙可問乎朕念孫孝愉尙能辦事
且係孫嘉淦之子屢次加恩優擢在道員任內未久卽用爲四川
臬司又因其母年老有疾不能迎養准以升銜留任昨福建按察
使缺出卽將伊補授所以體恤成全之者無所不至使伊稍具天

良自宜感激報效乃於典守重責漠然不顧致緊要官犯倖逃憲
典迥出情理之外必係孫孝愉因與蔡琛會同爲刑部司官贍徇
舊日情面豫漏信息以致自戕情罪甚爲可惡此非尋常失於防
察者可比孫孝愉著革職發往軍臺效力贖罪崔應階亦著交部
嚴加議處司獄賈聯玉著革職拏問同禁卒人等交崔應階一併
嚴審定擬具奏○雲南提督本進忠於軍營病卒贈太子太保賞
銀一千兩治喪○庚午傳恆奏臣於七月二十九日至南底壩河
水勢寬深難以搭橋有賀丙豫備渡船運送臣親指示官兵隨到
隨渡於八月初一日渡完臣卽統領噶布舒所帶索倫兵五百與
提督哈國興所帶綠營兵二千一同進發已於初一日令賀丙前
往戛鳩催辦渡江船隻查蓋達以外均係野人地界官兵經過伊
等初懷疑懼躲避臣令通識言語之人曉諭互相笑語環集聚觀

每人於竹木叢密處砍伐枝株以見盡心臣賞給銀牌鼓勵伊等不復心向緬匪俱各安處得旨欣悅覽之○以李本爲福建按察

使

由四川松茂道遷

○甲戌添設廣東廣州協都司一員○乙亥諭軍機

大臣等賊匪趙三等藉緬匪聲勢在普洱地方滋事景線孟良等前已歸順此二年又從賊匪若不痛治斷難收服著傳諭阿桂攻克阿瓦城後由羅諸一路緝擒趙三最爲緊要景線孟良等部落人等或應威服或應撫綏務期妥籌果斷永靖地方斷不可姑息因循並傳諭傅恆知之○傅恆等奏臣傅恆於八月初二日自南底壩起程初四日至戛鳩見賊寨一座並無賊匪卽帶同賀丙沿江查勘將渡口安設允帽寨適脫猛烏猛自猛拱來率沿江各頭目迎接並稱願隨勦緬匪脫猛烏猛懇給限與眾頭目趕辦渡船次日送來小船十隻竹筏二十排及撐船擺夷數十人據稟見在

趕辦隨得隨送賀丙所辦船已於初四日得十餘隻臣思西岸渡口先宜占據卽於初四初五兩日渡過綠營兵一千餘名索倫兵二百餘名駐紮營盤與東岸相望尤帽江面約寬三里水不甚溜惟船隻未敷且船小不能載馬匹正在籌辦適臣阿里袞亦於是日到公同商酌一面等候脫猛烏猛等辦船一面令弁兵紮筏俟各起兵到接渡臣等見渡江非易若對岸先有賊匪數十人卽屬可虞今大兵旣渡自可前進得旨欣悅覽之已得江西岸將來進兵自易得老官屯此實 上天恩佑利我軍行惟望陸續速聞捷音喜信耳○戊寅禁廣東私鑄唐宋元明古錢○己卯諭軍機大臣等昨經略大學士傅恆奏至夏鳩時見盡拉機舊日拒守之地止餘空營一座是其同至阿瓦巴無可疑則老官屯賊酋諾爾塔之撤回諒亦非誑語看來老官屯自當計日可得旣得老官屯後

阿桂卽須與傅恆分兵前往攻取阿瓦而老官屯係水陸扼要之區必須大臣統兵防守以聯絡前後聲勢前經降旨令伊勒圖在彼留駐今思猛密司曾有投順之信旣得老官屯卽當分兵收定猛密莫若令伊勒圖帶兵前往旣定其城卽著伊勒圖駐守策應而老官屯則令阿思哈統兵防守以成犄角之勢旣可壯我軍聲而有此數處駐兵與內地聲息相通後路尤爲安固至永昌騰越一帶督辦軍需糧馬諸務明德原係熟手卽令其暫署督篆在彼往來照應一切實力妥辦毋稍延緩俾傅恆等得以迅速進取早奏膚功將此傳諭伊勒圖阿思哈明德一體遵照並諭令傅恆知之數日未得軍營信息甚爲繫念以後隔數日卽行奏聞一切情形毋稍遲緩○傅恆奏八月初一日奉到七月十一日廷寄欽遵辦理外臣等行抵南蚌路徑尤覺險隘官兵人等皆須步行所有

奏報事件俱由步站較前未免遲延時日南蚌去夏鳩不過五六
十里適值陰雨連縣水勢正湧小溪成河必需搭橋前路尙有南
龍河已遣人前往築橋約於初四日方可渡夏鳩俟至盤暮西岸
會合野牛壩造船兵直抵銅壁關時方可按程安設臺站得旨好
此摺接到尙無過遲今日自伊瑪圖進圍首矢卽中一應已交福
隆安令其寄汝矣機會甚好朕亦並未馳驅也

九月庚辰朔諭嗣後杜爾伯特王公台吉等子弟年至十八卽照
內扎薩克等分別賞給台吉職銜永爲例○傳恆等奏八月初九
日眾頭目復來謁見並獻鹽米瓜煙等物臣等分別賞給紬布並
面加詢問據稱一名猛雅一名坎連一名僧蠻長一名僧九越一
名興桑瑪俱向受緬子蹂躪今大兵進剿願隨營調遣等語當將
猛雅等酌留差用令脫猛烏猛先回猛拱豫備一切再賀丙之父

賀洛於初八日來至軍營據稱三十一年天兵進剿緬匪伊從夏
鳩率屬歸誠被緬匪衝散數年來潛身阿結地方手下尙有獯夷
四十戶今聞大兵已到允帽親來叩見並稱聞緬匪欲在暮魯地
方派兵堵禦願往探消息等語查賀洛係年老誠實人前往探聽
自可得賊人確信至賀丙此次甚屬出力前已賞給千總銜今請
升賞守備銜以示鼓勵報聞○辛巳諭本日內閣進呈河南巡撫
題本一件票籤內於宏字缺寫一點甚屬無謂避名之說朕向不
以爲然是以卽位之初卽降旨於御名上一字止須少寫一點不
必迴避後因臣僚中有命名相同心切不安屢行陳請者始許其
易寫宏字其實臨文之體原可不必故於前代年號地名凡有引
用之處槩令從舊不准改易至於臣子尊君奉上惟在殫心宣力
爲國爲民方爲克盡誠敬豈在字畫末節拘拘於小廉曲謹哉且

宏字已屬避寫卽與本字無涉若因字異音同亦行缺筆展轉相
仍必至八紘等字槩從此例勢將無所底止復成何事體耶此籤
卽著補點嗣後俱照此書寫將此通諭中外知之○諭福康安著
馳驛前往看視伊父經略大學士傅恆○諭軍機大臣等傅恆阿
桂等奏夏鳩蠻暮並無賊匪猛拱人等豫備船隻俱屬恭順官兵
已據地安營等語事機順利不日卽可成功但恐我兵過後賊人
或由山林僻路潛出滋擾卽見在投誠之猛拱人等經緬匪逼勒
又復從賊均未可定著傳諭傅恆等宜加意防範計出萬全總之
用兵不可不慎朕心甚爲慮念務熟籌妥協爲之○戊子傅恆等
奏近日各頭目小心供役將米石牛隻送來軍糧儘可籌辦查邦
木納至猛拱沿途有南隄南拱二河十七日該二處頭目三人來
見一名僧節歌一名僧瑪東一係龍坑野人官並稱聞大兵到來

已在南隄南拱二處搭有橋梁因連日大雨被水衝淹今聞經略過江先來迎接卽回去料理等語臣等量加賞給卽令各回本處至賊人信息俟賀洛回日另行奏聞得旨覽奏俱悉○己丑上駐蹕避暑山莊○癸巳諭軍機大臣等阿桂奏八月二十六日卡外竹林中拾得賊人書信內稱知大兵渡夏鳩由猛拱前進伊等由老官屯派兵八千從水路迎接又由阿瓦出派多兵從旱路在暮魯防守哈坎亦已豫備等語此係賊人未及准備揚言以緩我兵之意阿桂所稱不必答書俟傳恆到時卽定戰攻之計甚屬有見但賊人投書妄言不可使兵丁傳播再從前令阿桂襲取老官屯原因無人防守是以令其早占要隘今諾爾塔旣回至老官屯則輕進無益阿桂此時不必發兵俟三路兵俱集蠻暮會同傳恆仍由江西岸前進阿里衮由水路前進阿桂由江東岸前進則一

舉卽可成功再稱八月二十一日有賊船四隻約六七十八人遙向大營放礮等語大兵旣占賊人地方賊必來哨探著阿桂妥爲防範乘機擒拏宜令葉相德酌撥水師埋伏俟賊來時突出擒拏獲其一二人卽可知其情形此不過擒賊以知虛實耳非以水師與賊打仗阿桂不可拘泥本年進兵較早後隊兵未免遲滯阿桂隊內兵數尙少今伊勒圖已領兵前赴蠻暮到時阿桂如有用伊之處卽留彼協助否則令其前往猛拱迎接傳恆阿桂送伊過江卽據住渡口策應伊勒圖須帶兵二千名前往方安道路遙遠俱賴將軍大臣等相機辦理再傳恆前奏暮魯有賊防守等語但未知見在情形如何至蠻暮一帶小部落從前歸順緬匪今因大兵至彼故來投誠雖無可慮然我進兵後或恐其滋事若竟將伊等勦辦又屬無益著傳諭阿桂約束獎勸加意辦理至見在得有賊匪

信息作速奏聞並傳諭傳恆知之○乙未 上奉 皇太后自避

暑山莊回鑾○丙申散秩大臣噶布舒於軍營病卒賞銀五百兩

治喪○庚子諭高晉奏沈德潛於九月初七日在籍病故等語沈

德潛績學工詩耆儒晚遇受朕特達之知由翰林洊擢侍郎令在

上書房授讀嗣以年高引退特許歸田俾得頤養天和爲東南縉

紳領袖前者屢次南巡見其精神強健疊沛恩施加授尙書銜晉

階太子太傅並令在籍食俸年來復時予存問方冀壽躋百齡益

承優眷今聞溘逝深爲軫惜著加恩晉贈太子太師入祀鄉賢祠

所有應得卹典該部察例具奏尋予祭葬諡文愨○辛丑 上奉

皇太后還京師○壬寅命劉統勳德成會同吳嗣爵富明安查

勘山東運河○癸卯諭據經略大學士傅恆等奏稱九月初二日

猛拱頭目興堂扎同營稟稱伊到節東寨內尋見土司渾覺並頭

目參龍籠等諸人一併帶來投誠隨卽酌量安撫辦理等語傳恆等不避雨水泥濘迅速進兵收服猛拱措置有方卽措辦口糧等項亦均妥協朕心深爲嘉悅已於摺內批示矣經略大學士傅恆著賞給三眼孔雀翎小荷包四箇並賜詩示獎阿里衮著賞給小荷包三箇向來三眼孔雀翎無賞給大臣之例傅恆自出師以來籌辦軍務實心實力悉合機宜是以格外加恩賞給傅恆接到卽行戴用於行兵更覺威嚴且使緬子猓夷等觀瞻益知尊重至渾覺從前雖稍懷瞻顧而一見興堂扎卽隨至投誠且其年僅十八情尙可憫伊係倡議迎降之士司著加恩賞給孔雀翎並荷包二箇卽交傅恆傳旨賞給其頭目脫猛烏猛興堂扎及賀丙亦屬奮勉俱著加恩賞戴孔雀翎渾覺係該處土司或賞以二品三品頂帶其脫猛烏猛等三人或賞以四品五品頂帶之處傅恆等視伊

等勞績酌量賞給○丁未傳恆奏興堂扎自南養地方同時稟稱並無賊匪蹤迹聞緬子在暮魯一帶招集擺夷築寨堵禦所集擺夷大半逃走猛養土司亦領屬人躲避等語從前緬子所恃惟猛拱猛養一帶土司今猛拱收服猛養地方亦猛拱所屬臣收服猛養後前至蠻暮即可會兵直抵阿瓦下部知之尋又奏臣等至猛養地方前哨兵擊殺數賊興堂扎奪取猛養寨並令官兵搜取附近賊寨十七日留住一宿官兵尋得已熟田禾數處卽令刈穫以作軍糧渾覺脫猛烏猛等所辦糧石陸續運至猛拱足以敷用臣等於十八日起程往南洞干地方三更時候千總霍明崇把得隆及興堂扎等還報奪取南隼寨莫邦寨外復奪二寨共奪得牛二十八隻糧十五石男女三十五名口寨長鄧睦莫邦博孟一併擒來臣等審訊鄧睦莫邦博孟俱未從賊抗拒寬宥不殺以示恩惠

交渾覺興堂扎帶同前進以備驅使所擒拉匿拉賽卽行正法祭
肅臣等復行三站至蚌板雅地方派兵搜剿賊皆逃避尋得熟田
六七頃令官兵收穫充糧得旨欣慰覽之伊勒圖奏臣與阿桂行
抵新街船隻亦於十八日畢集訪知自新街前進必至哈坎始可
渡江聞哈坎地方有滾弄洲洲內有賊寨若自滾弄洲渡哈坎可
就近搜查商諸阿桂意見相同遂於二十二日渡滾弄洲二十四
日渡畢於各寨內搜獲男婦五人已送交阿桂辦理臣至洲之西
涯查勘江之西至哈坎地方皆峻嶺深叢凡坎上可登之路皆立
長卡卡內賊匪約二三百名以鳥槍相拒臣遂分派兵三百餘名
於二十六日五鼓時令領隊大臣明亮等分三隊攻取臣與提督
伊昌阿侍衛官員等於江岸放礮助威及黎明賊始知覺我兵船
隻抵岸奮勇爭先賊棄卡竄走我師遂得其卡作速渡江並於各

處投覓生擒二賊次日渡畢卽起程赴猛養迎會經略得旨欣悅
覽之汝實長進矣勉之阿桂奏臣至野牛壩有蠻募夷目率官弄
地方獯夷來見詢以賊人情形據獯夷炯底噶稟稱本年情駁蓋
造大寺派官弄五寨人解運木植七月間解送至節蓋住九鈕地
方三日並未聞情駁死信等語報聞

冬十月己酉朔諭今日召見廣東按察使富松奏對全以漢語深
染漢人習氣伊係富達里之子久任道員一味養尊處優自耽安
逸不復知有滿洲舊風豈可令其仍居外任富松著留京候旨另
用廣東按察使員缺著阿揚阿調補李本著調補四川按察使其
福建按察使員缺著張鎮補授○庚戌諭前以東三省人員不識
漢字難以辦理綠營事務諭令兵部查奏遇綠營員缺停其補放
至伊等子孫生長在京者原與舊滿洲無異自應分別揀用此次

撤回人員著引見後候旨並交八旗都統等查明在京已歷兩代者嗣後仍准其選補綠營但不可因有此旨於騎射清語皆不學習○染漢人習氣○辛亥諭軍機大臣等據曹秀先奏浙江餘杭縣南湖久經淤塞占墾民田以致山水發時杭嘉湖諸郡易被淹浸請敕地方官查勘疏濬永杜水患一摺所奏甚爲近理餘杭南湖既承天目山之水以資杭嘉湖三府灌溉之利所關甚重自當令其豬洩得宜俾無淤墊乃因久未開濬致令無識鄉民因葑淤占墾專利病鄰止顧一隅有限之熟腴而阻三郡無窮之美利於理既未平允卽以升科而論歲徵不過一百七十餘兩而一經山水驟漲節宣無地遂使杭嘉湖府屬窪下之區多被淹浸勢必分別蠲緩賑恤所費何啻什倍尤屬得不償失其閒輕重權衡較然可見著傳諭永德卽親往履勘悉心籌畫如果湖田梗遏水道卽

當設法挑濬寬深使下游各府永藉灌輸利賴並查明上南湖舊有之田鄉民於何時侵占因何報墾升科詳悉清釐妥協辦理若該處形勢不盡如曹秀先所言或上湖之田藝闢已久無礙水源則又不必盡棄民恆產惟應將下湖通身濬挖並量設堰閘使得容蓄來源疏通泉脈於水利農田兩不相妨方爲妥善永德務須實力承辦毋得稍涉粉飾及爲遷就調停之計卽將實在情形據實奏聞如或草率了事將來或尙有滋害之處惟於永德是問所有曹秀先摺並著鈔寄閱看尋奏南湖開自漢嘉平閒舊有上下兩湖上南湖地勢本高前明淤漲成田勢難濬復下南湖承餘杭上游之水西南一帶有開墾升科田畝占據湖身應行清釐至茗溪諸水本不與南湖合無關杭嘉湖三府水利惟湖東設有滾壩壩內阜英塘關係餘杭民用應加培補請照紹興修築南塘之例

按畝出錢官收民辦得旨如所議行○壬子諭前以揆義於江西藩司任內與屬員黃肇隆交結並有託買優伶及收受禮物等款因降旨交高晉將黃肇隆提審具奏今據奏稱黃肇隆與揆義逢迎結納各款一一供認並究出揆義濫行卓薦黃肇隆及違例豫借養廉請拏交刑部治罪等語揆義前於盜犯龔在山擄爲湖北盤獲一案已照部議革職令以三等侍衛銜前赴喀什噶爾效力今既據高晉審出貪鄙營私各情節自應按律治罪揆義著革去侍衛職銜拏交刑部訊明治罪○諭曠著著往喀什噶爾更換范宜忠來京徐績著以按察使銜赴哈密辦事○諭軍機大臣等據阿思哈奏軍營糧馬不敷情形一摺甚屬非是已於摺內批飭矣軍營所需糧馬自當豫籌妥協至師行以後卽應就所至之地隨宜籌辦或於投順之罷夷等發價購買其未經歸附者亦不妨掠

取充用卽如經略傅恆自夏塢一路前抵猛拱沿途所需糧石皆買自猛拱所屬猺夷其數甚爲充裕可見事在人爲若措置得宜則軍行皆得實濟儻必須盡由內地接濟且必滿意計算勢將一步不可行有是理乎又如馬匹一項固由進兵期早致沿途不無倒斃但今歲全賴師期較早兩月是以猛拱一帶皆爲我有若必瞻前顧後則緬匪必早已得信拒守夏塢又安能長驅直入乎看來今歲進兵一節惟傅恆勇往直前實心籌辦卽阿桂已不無卻顧逡巡之意而阿思哈則更怯懦不堪伊前日奏辦糧情形已微露畏難之意今竟顯爲此奏明欲先占地步在伊未嘗不以此奏爲得計獨不思行軍之事功過皆當共任豈能因其謙爲奏及遽得爲之寬解且此番進剿緬匪實有難於中止之勢苦如阿思哈所見竟以爲萬難措手直欲阻撓軍務全不顧國體所繫是誠何

心阿思哈如此行爲竟不能受朕恩矣至所稱後隊兵到蠻暮藉壯軍聲更不成語我兵正當漸次前進傳恆一到即可分路攻取老官屯其蠻暮等處不過後路策應並非大兵屯駐之地又何必須藉以示壯而阿思哈所言竟庸謬畏葸若此阿思哈著嚴行申飭但伊旣以糧馬爲言內地亦不可不多方設法廣爲接濟使彼得有所藉口明德辦理糧馬乃其專責屢經飭令加緊督辦且已籌及年餘何至今尙不能源源繼續而彰寶以協助之人甫到滇省一經催趨所屬卽爭先急公明德豈竟全無人心何竟不知愧奮著傳諭明德彰寶令其查明見在糧馬等項因何遲延究係何人督辦不前卽行據實參奏並著將應用糧食設法迅速接運務在多多益善及馬騾牛隻亦竭力籌送以資應用彰寶任事奮勉此時卽協同明德妥協經理無分畛域明德若因有彰寶同辦妄

生諉卸之心是又重自取戾不能復爲寬有矣將此明切傳諭並諭傅恆知之○癸丑彗星復見○諭軍機大臣等據欽天監奏七月內彗星見光照西南經日度遂滅今又見於西南光照東北等語從前彗星光射西南以爲勦滅緬匪之兆今乃復見殊覺可疑見在傅恆等領兵前進賊酋懼駭或親身投誠或用計擒獲則犁庭掃穴即可奏凱旋師儻惜駭逃往暹羅亦不必遣人追取凡事之成功原有難易應戮力者自須竭力辦理如盡力爲之勢必不能亦當知難而退傅恆等計由老官屯直取阿瓦須防我兵深入賊人潛襲其後所關甚重不可少有疏忽萬一道路險阻進兵不易須早作退步老官屯係緊要關隘卽於該處駐兵據守亦可但道遠難以懸揣惟在傅恆等相機辦理此旨特因彗星復見使知謹慎之意著密諭傅恆知之○乙卯諭向來朝審秋審緩決人犯

每閱數年卽降旨該部酌予減等以省淹繫今自乾隆三十年查辦以後又經四載人犯爲數漸多此等罪犯秋讞時固難遽邀矜減而屢經議緩情罪尙不甚重徒令久滯囹圄讞牘轉滋塵積著該部將朝審秋審各犯曾經三次緩決者覈其案情分別請旨減等以副矜恤庶獄之至意○諭前用阿思哈爲雲貴總督以其曾在北路軍營辦事諸務尙能諳習乃伊甫至騰越卽奏該處辦糧情形已存畏難之見及至蠻暮所奏糧馬事宜專欲仰給內地竟不知就所到之處實力籌辦一味取巧豫占地步不復具有天良深負朕委任之意阿思哈著革去總督給與副都統職銜在領隊大臣上行走以觀後效彰寶簡用巡撫甫經到滇卽前赴永昌騰越一帶催督軍儲甚爲奮勉明德承辦軍需屢經訓諭始終不能實力籌畫豈堪復攝督篆彰寶卽著署理雲貴總督明德著署理

雲南巡撫仍帶革職留任江蘇巡撫員缺著永德調補熊學鵬回籍守制已將二載著署理浙江巡撫其所降之級卽著隨帶○諭軍機大臣等昨以阿思哈具奏糧馬不敷情形專圖取巧自占地步已降旨嚴飭頃據明德奏前後糧米共運過一萬餘石其數不爲不多阿桂等如能就所至之地籌畫買用何至專仰給內運卽如經略大學士傅恆前往夏鳩一路僅裹帶一月口糧內地並無續運而經過之地卽向獮夷等設法購辦食用頗屬充裕若亦如阿桂阿思哈之專圖坐食何以能不煩饋運從容給足如此阿桂阿思哈豈不聞知何以竟不稍知感發天良出力籌畫耶况阿桂既至新街其猛暮新寨等處附近地面皆可購覓何以全不計及豈將軍等專以打仗爲事而糧餉等項可置而不問耶且阿桂等又並未實有衝鋒殺賊之事則其在軍營更復有何急務設口糧

閒有不敷亦當如傅恆之通盤籌算撙節支發若隨所運糧石多寡儘給弁兵聽其併食浪費卽一月可耗數月之糧猶復藉口於運餉不繼勢將一步難行又安用若輩庸劣無能之將帥爲耶在伊等之意未嘗不以糧馬等事竭蹶由進兵期早之故曾不思此次進剿幸而期早兩月是以傅恆得直渡夏鳩進收猛拱可以過行無阻卽阿桂所奏滾弄江口水柵亦是緬匪聞信後倉卒備禦若阿桂一至蠻暮卽領兵前赴新街彼更猝不及備並此處亦可不須接仗矣且老官屯緬賊至今不過五百而所集攏夷波竜亦僅千餘可見賊人並未能豫爲防拒若阿桂於蘇明燦到營時卽領兵徑取老官屯則賊眾更不及施其糾集之計豈非阿桂坐失極好機會伊此時甯尙不知悔懼乎進剿緬匪一事實非得已今傅恆督兵架入諸事皆實心經理動合機宜深能仰體朕意而阿

桂等一味意存觀望。竟若此事專係傅恆一人獨任其責者。不知是何肺腸。軍營經略將軍皆係朕簡任之人。並當同心協力共襄國事。在內辦理軍需者。自應安連接濟。多多益善。而領兵大臣則應隨地籌買。經理得宜。以期足用。若各坐分畛域。不思黽勉自效。豈真傅恆一人當爲朕出力。而伊等皆非食祿受恩者乎。阿思哈前日所奏之摺。全無良心。實出情理之外。已降旨將伊革去總督賞給副都統銜。在領隊大臣上行走。尙係格外加恩。儻將來仍不痛自愧奮。卽當重治其罪。彰寶簡用巡撫。若如喀爾阿之安坐雲南省城。亦不能辦及永昌運務。乃伊一到滇省。卽迅往催督軍儲上緊趲運。是其本心誠篤可嘉。因令其卽署督篆。而明德始終不知策勵。閱其兩次所奏之摺。敘述彰寶催辦糧運等語。竟恬不知恥。若此。卽如馬騾一項。明德謂滇省無從購辦。而稱彰寶運糧馬

驟皆臆壯可用試問此項馬驟獨非滇省所有何以明德辦理年
餘轉不敷用而彰寶初至其地卽能應手裕如耶若再令其兼署
總督必至貽誤因令其署理巡撫仍帶革職留任以觀後效朕臨
御三十四年於臣工功罪惟視其人之自取絲毫不存成見如從
前西師之役信賞必罰尤眾所共知並未嘗有濫邀恩眷及處分
稍有屈抑者阿桂等豈竟全不記憶而不思激發天良以期合力
贊助迅奏膚功耶將此剴切申諭並諭傳恆知之○諭各回城大
臣奏事副都統一體列名○吏部議覆直隸總督楊廷璋奏熱河
八溝理事同知二缺四旗喀喇河屯塔子溝理事通判三缺事務
繁重應如所請改爲調缺至三年俸滿理事同知通判向例與在
京主事較俸內升其所稱在外題升之處應毋庸議得旨依議本
內有該督楊廷璋奏請將所調理事同知通判三年俸滿在外保

題升用一節經部援例議駁但思此等人員揀調之後於外任事宜自爲熟悉若槩令推升京缺則口外地方屢易生手於公務無裨若歷俸僅止三年卽准升用外任仍屬調用他缺且未免倖開捷徑嗣後調任熱河等五廳人員遇積俸推升京官時著該督詳加區別除循分供職者仍照例以京員補用其中果有辦事出色才堪外任之員該督出具考語送部引見候朕裁定有准其外升者令仍留本任三年再行遇缺題補如此則地方既得諳練之人而廳員亦不致濫邀遷擢於課績程材均爲允協著爲令○丁巳諭軍機大臣等據傅恆等奏稱領兵至猛養地方土司等俱逃往暮魯遂令興堂扎拔取牲畜米穀前赴蠻暮等語大兵遠行坐待內地運送米糧軍需安能接濟傅恆乘賊逃逸卽拔取寨柵所獲甚多可見事在人爲阿桂何以不能如此辦理耶且其至蠻暮後

蘇明燦前來通信阿桂若能乘機襲取老官屯早可占據要隘今據傳恆擒獲蘭尼供稱緬匪船隻俱在提洞可知蘇明燦來時老官屯並無多賊阿桂坐失機會實屬可惜此事已過朕特加恩寬宥嗣後若復如此瞻徇必將重治其罪再傳恆奏請暫留瑚爾起在猛養屯駐俟攻取老官屯後分路勦辦暮魯所籌亦是瑚爾起著卽在猛養照應臺站仍於猛拱頭目內揀選一人駐紮見在所得猛養地方卽賞給渾覺管理伊當愈加奮勉但土地寬闊又有未便並著傳諭傳恆酌量辦理○己未諭軍機大臣等據阿桂奏大兵見在據守滾弄已遣伊勒圖領兵渡江迎接傳恆想此時傳恆早到卽可進取老官屯儻師行順利直抵阿瓦一舉成功朕所深望萬一不能我兵旣克老官屯已據要隘卽暫將索倫厄魯特兵撤回騰越荊州成都滿兵及京兵綠營兵俱屯駐老官屯俟明

年再辦亦妥再摺內奏稱獯夷披占薩稟稱阿瓦更換新王不令舊王主事見在招集戶漢人等抗拒大兵如不能敵卽來投誠等語緬匪旣立新王我兵前進時如將舊王擒獻則巨醜已獲軍威已振亦可蕺事若必不准其投誠欲攻阿瓦反似與僭駁復仇殊可不必著傳諭傳恆知之○賜卹雲南軍營病故總兵吳士勝○癸亥諭貴州布政使張逢堯見已起程赴京陛見且其年亦漸衰俟到京後再降諭旨按察使高積亦有應行解任質訊之事黔省見乏大員經理所有貴州布政使員缺著觀音保調補貴州按察使員缺著增福補授俱著馳驛速赴新任不必來京請訓直隸布政使員缺著周元理補授按察使員缺著李瑚補授至直隸軍臺文報前經特派觀音保專司督查今觀音保旣已調任卽著周元理專管○諭軍機大臣等威甯州知州劉標虧缺銅本鉛運

等項銀十餘萬兩經良卿參奏已將劉標及該管道府永泰馬元烈革職派內閣學士富察善前往同良卿查審昨戶部奏據糧驛道永泰揭報劉標虧空緣由並揭臬司高積營私飢法各款內有與良卿干涉之處則良卿不便令其會審此事亦非富察善一人所能查辦者矣復派侍郎錢維城前往會同吳達善赴黔查審但思錢維城雖係馳驛行期究未能迅速而黔省此案所關甚大不但臬司應解任質審卽良卿諸事模稜亦不必令其仍任封疆且恐伊等串通一氣若更耽延時日益恐扶同滋弊見已降旨將黔省兩司另行補授馳驛前往著傳諭吳達善卽將總督印務及所署荊州將軍印俱交梁國治暫行兼署此旨一到該督卽日起身馳驛兼程前往一到黔省卽將各案緊要關鍵速卽訊究確供如良卿高積等有應革審者一面奏聞一面革職拘禁毋任稍有騰

那扎飾及疏虞自戕等事俟錢維城到黔並會同富察善逐案秉公詳悉嚴審務令水落石出以懲積弊所有永泰原揭著鈔寄吳達善看本日良卿奏到查出劉標實在虧缺銀數一摺看來亦未可盡信並鈔寄吳達善等一併查辦又本日遞到阿桂自新街拜發報匣一件包袱內夾有普安州民吳俛等具控該州官吏土目等侵蝕恩賞銀兩私派累民之事款證鑿鑿甚可駭異自滇省辦理軍務以來經由各省俱特發帑金賞資急公奉上之民屢經飭令該撫悉心董察務使閭閻均霑實惠復經御史紀復亨奏及黔省辦差有苛累民苗之處特飭該撫據實訪查並經良卿節次查覆以官員胥役人等實無絲毫侵擾回奏今閱此呈詞則前者良卿所奏全係捏詞欺飾不可不徹底根究良卿之罪實在於此並著寄交吳達善等按款密查務得實情審擬具奏毋得稍有瞻徇

至此等呈詞關繫吏累民固不可不竭力查辦以示懲儆但軍營奏匣沿途俱係臺站弁役馳送安能入小民之手以此等呈詞滲入其中必係與臺站人等串通夾帶軍報事關機密敢於私啓包袱附遞詞紙達御實屬膽玩不法必當確究嚴治使知炯戒呈內所言係普安州之事自當先就該處附近驛站挨查其連名具呈之人或實有其人或捏造名姓及如何起意商同滲入緣由均著吳達善等一併悉心查訊確情覆奏良卿簡用巡撫數年來辦事總不實心今復有各案接踵敗露是其負恩曠職罪已難追吳達善到黔審有端倪卽傳旨將良卿解任其貴州巡撫事務卽著吳達善暫行署理良卿所有任所貲財並著吳達善留心訪察勿令豫爲隱匿寄頓將此密諭知之○諭據伊勒圖奏稱領兵渡江迎接傳恆於九月二十六日見江岸哈坎地方賊人築礮防守遂

於是夜分兵三隊直抵南岸奪取礮卡急將接應兵馬渡過等語
伊勒圖從前雖在軍前行走未歷戰陣今遇賊奮勇朕甚嘉悅著
賞給小荷包二箇仍令其將此次出力官兵存記獎賞其加倍奮
勇者給與功牌但未擒獲賊目稍不慚意耳○賜錢治平等四十
七人武進士及第出身有差○甲子諭據經略大學士傅恆等奏
收取猛拱後卽帶領官兵及猛拱土司渾覺土目興堂扎等攻取
猛養又於九月十八日自猛養起程前赴蠻暮已行三站至蚌板
雅地方前在猛拱一帶買取擺夷等糧石應用今過猛養地面沿
途割取穀石甚多軍食俱極充裕等語所辦悉協機宜如此方合
大臣忠誠體國實心出力之道傅恆自七月中由騰越統兵進勦
僅裹帶一月口糧而自戛鳩渡江以後經歷猛拱猛養已兩月有
餘所至購辦軍糧隨宜措置並未資藉內地續爲轉運而贍軍裕

如且足用之外尙可留餘備給蠻暮新街一路軍營之用可見事在人爲果經理得宜自收因糧於敵之益若阿桂自抵蠻暮屢次奏摺卽懇懇以內地運糧不繼躊躇卻願爲詞而阿思哈因身任總督軍需是其責成一到蠻暮亦卽以辦糧拮据入告意在豫占地步且經明德等陸續運送至萬餘石而隨到隨卽支發止圖仰給內運安居坐食在途並未自爲計畫就各該處情形或買或取以濟軍儲且伊等備帶銀兩至一萬五千有餘竟不知動用購辦似此一籌莫展將安用此統兵大臣爲耶馬匹一項長途涉歷山徑原不能保無倒斃此固由進兵較早之故然使非早期兩月緬匪必豫爲防備儻或拒守戛鳩南籠一路則獬夷且爲彼用我軍安能徑渡大江由西岸直收猛拱等處使後路廓清長驅無阻乎朕前見及此曾傳諭傅恆軍營尙未接到今傅恆摺奏情節萬里

之外與朕所見不謀而合可知辦事總此一理果能得其要領遠近本無二致若阿桂阿思哈心存畏難之見故動覺周章初不料二人向在西陲頗曾更事今竟退縮無能一至於此今年進剿緬匪事非出於得已屢降諭旨甚明至此時我兵已偪老官屯更萬無中止之勢若如阿桂等中懷鄙怯之見畏首畏尾豈大兵已將深入忽半途而返將復有待來年耶抑竟置之不問耶見在傅恆自至新街與阿桂等會合籌酌分路進剿已傳諭傅恆一切相機調度阿桂等竟全不足恃矣所有傅恆實心任事經畫得宜及阿桂等慙懦無能不知盡心奮勉之處明白宣示俾眾共知之傅恆奏摺並著譯出及前次所降諭旨一併發鈔○諭軍機大臣等阿桂此次在軍營諸事畏怯竟不可恃進攻猛密司豈伊一人所能辦理阿桂著革去副將軍在參贊大臣上行走伊勒圖人尙勇往

著卽授爲副將軍猛密司一路卽領兵前往仍著阿桂協助若再不知奮勉阿桂自思將復何所逃罪並著傳諭傳恆知之○調喀甯阿爲貴州巡撫富尼漢爲河南巡撫以胡文伯爲安徽巡撫姚成烈爲江蘇布政使增福爲安徽按察使由直隸熱河道遷○以金祖靜爲貴州按察使由湖北荆南道遷○乙丑命彰寶往駐老官屯籌畫撫輯事宜○丙寅諭昨因高晉奏請將失察邪教部議降調之副將劉鵬程遊擊白雲上仍留差委一摺朕以此等案件地方文員責成較重武弁情節本輕且案內文員已有旨從寬留任而武弁竟照部議降調未免偏枯已降旨將該員等從寬留任矣地方文武官弁承辦公事固應協力交濟均難諉卸但其中事理各有專屬則職司亦有區分自當酌理準情俾文武各員處分均得其平方爲允協卽如地方有聚眾抗官及江洋盜劫私鹽拒捕等案武弁之

責應重於文員一經聞信卽當實力追擊毋任竄逸漏網其有緝捕不力及不能先事彈壓防範者自應將該弁等嚴定處分而於文員稍爲酌減若民間邪教賭博燒鍋等事體察查辦乃有司專責與汎弁無與卽尋常鼠竊小案州縣官設有捕役人等自能隨時加緊緝拏懲治原可不資營兵之力遇有疏防處分當以文員爲重而武弁次之卽此類推其情形不可枚舉乃向來舊例輒以文武俱干吏議不復條分縷析何由使伊等各知勸懲轉且視爲具文謬爲抱屈甚無謂也著交吏兵二部將各項案情通行較覈悉心釐定何者爲文員專管何者爲武弁專管何者文武並有考成而同案之中或應文重武輕或應武重文輕一一明切分別定議著爲則例使犁然不致牽混以便永遠遵循又如文員獲犯兼免武弁武弁獲犯兼免文員一條亦屬從前相沿陋例如近日解

員遺失餉鞘經地方官獲犯而京師押解之員竟得攘功開復經朕飭部改正定例矣該部其舉一反三詳查例案逐一酌定條款具奏其失察邪教經部議處各案武員劉鵬程等之外或尙有已經降調離任者並著兵部查明請旨尋奏查文武處分奏准各成案頭緒繁多若照常扣限酌辦恐滋舛漏請容臣等分條詳酌次第進呈恭候 欽定編入新例通行見在到部各案仍請暫循舊例辦理從之○丁卯吏部議奏失察江西星子縣知縣李應龍乘災舞弊一案該管各官照例議處得旨錢琦顏希深佛德俱著革職從寬留任程壽見在患病不能供職年力已頽無上進之心卽著革任至此案星子縣知縣李應龍乘災舞弊冒銷侵蝕至一千七百餘兩之多非尋常漁利之劣員可比該管道府等俱係親臨上司平日何以全無聞見外省習氣不堪如此不可不嚴加懲治

若照常予以從寬留任伊等且視吏議爲無關重輕毫無做懼吏治更何由整肅若僅照籤依議無識之徒或以爲議處未經出名之人朕未留心詳閱雖予以應得處分亦不足以示炯戒所有廣饒九南道福彰阿前任南康府知府陳子恭裴志謙前署府事同知陳時謙楊大觀及會勘出結之前任南康府通判陳有光建昌府同知宋鑑均著照部議革職○戊辰諭明德辦理軍需糧馬是其專責屢經飭諭加緊督辦總不肯實心出力所運糧石不能源源接濟已屬咎無可辭今據經略大學士傅恆奏十月初一日已抵新街會兵剋期笨入而後隊繼進之兵尙未到齊前因官兵未能迅赴蠻暮已屢諭明德令其設法催趨前進何以至今尙未全抵軍營可見其平日辦理軍務專事空言塞責毫無實際竟成疲玩痼習卽如馬匹一項明德先奏滇省購買甚難尋復奏稱彰寶

運糧馬騾均屬臆壯可用已解往軍前試問此項馬騾獨非購自滇省何以彰寶甫至永昌卽能一呼而集而明德辦理年餘轉形竭蹶乎此言卽明德所奏其意卽自安無能甘讓彰寶實力任事可謂恬不知恥此時若卽將伊罷斥治罪伊轉得置身事外明德著拔去花翎照錢度例革去頂帶加恩仍暫署雲南巡撫革職留任以觀後效至阿思哈自擢任總督以來卽心存畏難之見一至蠻暮輒以糧馬不敷爲詞豫占地步圖卸承辦之責繼復以邊外不能購買糧石入奏惟思坐食內地運餉輒懦無能深負委任之意前已降旨將伊革去總督賞給副都統銜在領隊大臣上行走今據傅恆等所奏新銜情形糧馬等事尙需臨期措置則阿思哈在軍營月餘竟屬一籌莫展全不以軍行爲事是誠何心阿思哈著革去副都統職銜留於軍營效力贖罪伊二人如再不知愧奮

是自速重戾不能復爲寬貸矣朕於臣工處分輕重惟視其人之
自取況軍營信賞必罰尤不肯使略有屈抑總期協乎大公至正
並不能稍參絲毫成見也將此通諭知之○諭軍機大臣等前令
阿桂等由巒暮進兵原因此路尙近欲其先行籌備船隻兵餉傳
恆一到卽可進攻老官屯今據傳恆奏到於十月初一日已抵新
街一切尙需措辦阿桂所司何事前已降旨將伊革去副將軍令
伊勒圖補授本日傳恆摺內又稱伊勒圖於哈坎遇賊時圍守竟
夜次早賊俱逃逸等語看來伊勒圖亦未必可恃軍營見在無人
進兵猛密司事關緊要著傳諭傳恆無庸拘泥前旨卽行札商阿
里袞於伊勒圖阿桂二人內秉公酌定一人一面授與副將軍印
信一面奏聞再明德於十月初六日具奏各隊兵丁約計此時可
抵軍營等語看來未必足憑明德與傳恆前後奏摺僅隔兩日何

以傳恆初四日摺內仍稱糧馬尙須籌備顯係明德支飾並著傳
恆將兵丁到營日期查明具奏○己巳諭朕恭閱 皇考諭旨有
飭禁外官畱養優伶之事 聖訓周詳恐其耗費多金廢弛公務
甚且黃緣生事 敕督撫不時訪查糾參雖一二人亦不可徇隱

聖諭久經編刊頒行督撫藩臬等並存署交代自當敬謹遵循
罔敢違越何以近日尙有揆義託黃肇隆代買歌童之事豈伊等
到官後於衙門尊藏 上諭度之高閣全不寓目耶一省如此他
省之未經發覺者恐尙不少一事如此他事之不能由舊者並可
類推 皇考十三年整綱飭紀所以爲吏治人心計者無微不至
朕每披尋 謨典省懷實深諸臣何竟冥然罔覺於 訓行成憲
視若弁髦乎可見外省惡習錮蔽已深凡禁令所布始則具文塞
責久且並具文而忘之卽朕所降諭旨尙有閱數歲而虛應故事

者似此玩不率教何以副朕孜孜求治之意思之實可痛恨著通諭直省督撫藩臬等各宜正己率屬於會奉禁革之事實力遵行毋稍懈忽若再不知儆悟甘蹈罪愆非特國法難寬亦爲天鑒所不容矣並將此明白宣諭中外知之○諭本日召見請訓之知府刁玉成張允觀謝自泌三員雖均屬簡缺看來刁玉成似尙堪循分供職其張允觀謝自泌人甚平庸俱難勝任知府有表率屬員之責卽非要缺亦豈可使闕茸無能之流濫竽充數貽誤地方張允觀謝自泌俱著帶知府升銜以同知用向來俸滿推升人員本有該督撫出具考語之例但從未見督撫等加以切實甄別槩行循資送部卽予銓升舊例原未允協此等歷俸年久之員第因資格已深按例推用其才具非出眾可知卽在各本任尙恐不免竭蹶若竟擢之方面必致曠職誤公或因事旋罹糾劾於課吏官材

均無裨益嗣後同知知州至應推升知府時著該督撫悉心確覈將實在堪勝知府之任與否出具切實考語送部引見其中設有冒濫自難逃朕洞鑒惟保送之督撫是問或應升之員於知府實不能勝任而平日尙屬奉職無過者卽據實聲明准其以知府升銜仍留同知知州之任庶量能授官尤爲覈實至張允觀謝自泌二員係吳紹詩鄂寶出具考語一則稱其屢署府事並無貽誤一則稱其老成詳愼今所見不副所言可見伊等於察吏全不實心視此事爲無關重輕具文塞責殊屬不合吳紹詩鄂寶著交部議處○庚午諭本日句到河南省情實招冊內有徐庚一犯因伊子徐國泰興立邪教照大逆緣坐律問擬斬決改爲監候覈之原案該犯本不知情特緣伊子坐罪是以停其子句但思向來辦理逆案內凡緣坐各犯秋審時經九卿法司均照例列入情實而朕悉

準罪人不孥之義並子從寬免句固屬法外施仁其中酌理準情亦當有所區別如逆犯家屬內所有弟兄妻子自當按律緣坐至本犯之父則更較別項親屬不同設使於伊子肆行悖逆之事原係知情是該犯之父教子不軌卽屬逆案正犯不得謂之緣坐僅伊子所犯平時實不知情及並未同居無從覺察者事發之後遞行因子及親一槩坐以大辟於情旣覺可憫於義尤屬未協嗣後遇有此等逆案家屬應照大逆緣坐律治罪而該犯之父實不知情者應如何酌量定擬明著爲令俾可永遠遵循著大學士九卿會同該部悉心詳議具奏尋議比照大逆定罪之犯本與實犯正案不同其親屬緣坐自應分別辦理查律載謀叛未成者父母祖父母俱流二千里嗣後比照大逆緣坐之案如該犯之父實不知情應照謀叛之犯父母擬流律改爲流三千里其祖父伯叔亦分

晰減流從之○辛未吏部議奏國子監遺失書籍該管各官分別議處得旨吏部議處國子監遺失書籍一疏將觀保護以革任陸宗楷等議以降調公過處分週年率從寬仍予留任使眾人見因公議處仍得安享高官益增其平日不肯實心任事之念此案諸人又各有當去之舊降黜分所應得如觀保自用爲部院大臣兼管旗務以來二十餘年於各任內應辦之事從未見其認真經理虛有其表毫無實際陸宗楷以其居官年久由國子監祭酒未及兩年擢至尙書屢經召對從未一語奏及政務諮詢所及惟是唯諾而已良誠曾用爲通政使旋以獲罪罷斥復經棄瑕錄用亦並未見其加意奮勉梁錫璵初以經學進用近來年力已衰學問亦漸荒落伊等皆非國家得用之人何必令其徒曠職守若僅照籤批發不爲明白宣示恐無識者必以爲此本朕未加詳閱照例批

發矣不知朕於諸臣功罪權衡銖兩輕重務協其平卽尋常議處本內例不出名之人尙留心檢覈况伊等皆簡任大臣耶觀保著革任仍在上書房效力行走良誠陸宗楷俱著降二級調用梁錫璵著銷去紀錄四次仍降一級調用○以王顯緒爲山西按察使由甘肅肅州道遷○王申調永貴爲禮部尙書託庸爲吏部尙書伊勒圖爲兵部尙書伊勒圖見在軍營以託庸兼署○調吳紹詩爲禮部尙書以裘曰修爲刑部尙書○癸酉禁福建廣東民人私赴臺灣見流寓者編設保甲毋任藏奸○乙亥諭大臣子孫子廕爲國家推恩令典亦所以酬獎勤勞渥澤所加自宜覈實乃向來議廕止論品秩之崇卑不復詳加區別定例原未允協文武大臣一品中如大學士尙書都統總督等官二品中如侍郎巡撫副都統等官皆分職任事爲國宣力之員循例子以廕生固屬分所應得卽世

爵內之公侯伯等其祖父勤庸懋著錫慶承家襲爵旣尊敘廢自
難從減並照一品子廢亦與延賞之義相符若子爵男爵之一品
二品或先世功績稍差或襲次久而遞減伊等得列崇階已爲厚
幸且其平日並無職任微勞僅以朝期上班或該旗應差而竟與
內外大臣等及公侯伯爵一體授廢殊非所以重官聯昭風勸也
朕恭閱雍正二年 皇考上諭將世職一品二品俱照三品給予
廢生誠愼重名器之至意因交吏兵二部詳查頻年所辦敘廢之
案仍沿舊例而奉 旨以後並未將此等世職分別給廢此皆舊
日部臣存官官相護之見蒙混濫賞干譽所致第以事越多年姑
免深究嗣後子爵子廢著照三品例議給男爵子廢照四品例議
給其作何分別授以文武官資及情願改用旗員應授何官之處
著吏兵二部詳悉妥議具奏尋議嗣後滿洲子爵三品廢以通政

司經歷太常寺典簿部寺司庫光祿寺典簿用男爵四品廕以鴻臚寺主簿註冊一時無缺以各部院筆帖式銓用蒙古三品廕照漢軍例以七品筆帖式用四品廕以八品筆帖式用漢世職三品廕以中書科中書大理寺評事太常寺博士典簿通政司經歷等缺用奉旨外用者以知縣銓選四品廕與捐納監生一體考定主簿吏目職銜輪班選用至願改旗員者八旗無七八品員缺三品廕作爲七品廕監生四品廕作爲八品廕監生令隨旗行走遇應升缺出與應用人員一體揀放漢世職改武者三品廕以千總分別營衛用四品廕以把總用從之○諭各旗王公所屬人員服官在京者向遇年節生辰一起本門叩謁尙屬分所當然若伊等既膺外任則均有當官公事其迹易涉嫌疑各宜自知防檢前以王公等於所屬外任人員每多需索會降旨嚴切申禁比來諸王公

頗知奉法自愛不敢踰閑而此等因公赴京人員尙多照常問謁雖見在不致有結納逢迎之事但恐日久因循王公等或罔知顧忌謁見之不已必且託其購辦器物購辦之不已必且從而關說事端甚至忘公徇私習成流弊其所繫於官守朝常者甚大用是明晰詰誡爲之杜漸防微亦正所以先事保全之也昨於行在召見永定河道滿保奏稱伊係四阿哥屬下人應往叩謁朕思令行自近自當舉一以例其餘嗣後各王公屬下人等惟京員向各門往來仍照舊不禁外其有見居外任職官因事來京者槩不許於本管王公處謁見通問以清弊源著爲令儻仍不知省改或久而復沿故轍一經發覺除本人從重治罪外其本管王公等亦一體懲治必不稍爲寬貸將此通諭知之○令直隸入官地畝停止旗員查丈定租○丁丑傅恆等奏臣等進攻老官屯據住江口十月

初八日賊眾潛至江灘左右紮寨遂派海蘭察鄂呢濟爾噶勒前往捉生擒獲厄諾一名訊據見有得楞子頭目呀得諾帶船十隻蓋拉機帶船百隻從阿瓦前來定鮮普帶兵百名從西岸前來等語臣傳恆阿桂遂在東岸豫備阿里衮伊勒圖在西岸豫備約定分路夾攻初十日賊船三十餘隻沿江前來遂分派策應見有穿紅衣賊目駕大船插紅纛侍衛阿爾蘇那帶兵直攻賊船護軍校烏什哈達躍入水淺處射傷賊眾大船內賊目持槍抵禦被披甲烏雲保射殪江岸賊俱擁出適海蘭察趕至與阿爾蘇那等棄船上灘合力勦退奪獲大寨三座器械米糧無算計東岸官兵共殺賊五百餘名臣阿里衮帶領明亮等由西岸直衝寨壘擊敗眾賊乘勝追入大寨正安劈山礮攻打賊已逃散計西岸官兵共殺賊五百餘名細察賊眾情形無多伎倆議定嗣後進剿乘其未立寨

時併力克取得旨初次接仗卽能如此獲勝覽奏甚爲欣慰○賜卹雲南軍營病故副都統蒙武爾岱

十一月己卯朔傅恆等奏臣等奉旨令進兵阿瓦時若急難攻取卽撤回老官屯駐守酌量辦理查老官屯地方係江中洲渚東猛密西猛野南阿瓦北猛拱猛養水陸交通若撤兵屯駐四面受敵且該處駐兵虎踞關一帶亦須接應一時恐難照顧容臣等攻克老官屯後相度情形請旨遵辦報聞○庚辰傅恆等奏臣等公同商議由水陸兩路進攻老官屯查老官屯在大江之東東岸俱係密箐並無道路水路兵船沿江行走恐有賊匪潛伏深林阻其前進臣傅恆見在協同阿桂領兵向江東開路進取並可保護船隻又寄信旱塔調取龍陵兵亦由東岸前來併力夾攻得旨好佇候爾等喜音○癸未諭向來御門日期奏事處人員遇各衙門及科

道封口奏章槩不轉遞此皆伊等拘泥舊例甚屬無謂朕綜理庶政凡內外臣工章奏無日不進御披覽豈有納之於平時而於御門聽政之日轉卻而弗納之理且御門不過片刻既退仍照常辦事本屬兩不相妨而此等封口奏章或係糾彈或關建白其中緊要之事並有須卽予施行者若既至宮門復行駁回於公務既不無延緩且恐無識者轉疑奏函有壅於上聞之時於政體亦屬未協在前明朝政廢弛君上每不樂親爲聽覽臣下望風希旨往往藉故稽留以售其蒙蔽之術我國家綱紀肅清朕夙夜孜孜勤求治理從不使臣工得以阻格自專矧奏牘上陳豈宜稍有屏遏嗣後御門日期凡有封奏事件俱著一體接收呈覽著爲令○諭向來萬善殿有年幼太監十餘人在內讀書派漢教習一員專司其課該處復係僧徒典守與學舍雜居旣屬非體且太監職在供給

使令就使讀書不過教之略識字體何必派選科目人員與之講授令其通曉文義乎在前明閭閻豎擅政司禮秉筆惟所欲爲因使若輩通文便其自利之計甚至選詞臣課讀交結營私此等批政朕每深非而痛斥之我朝宮府肅清太監等從不令干與政事卽不識字何礙或伊等閒有登記檔冊之處但能顯辦字畫足矣見今讀清書之太監等在長房一帶派內務府筆帖式課之此等讀漢書之人原可附近該處另選內務府筆帖式之會讀漢字書者授之句讀又何必爲之專設一漢員教令讀書乎所有萬善殿派用漢教習之例著永遠停止其如何酌撥房屋選派人員各事宜交總管內務府大臣定議具奏○諭軍機大臣等戶部奏據革職知州劉標遣人赴部控告銅廠賠累及各上司歷年勒索底簿一摺所開俱有款證可指似非盡由劉標之畏罪反噬而其中方世

僞需索多至六千餘兩且有徑索金銀之事殊堪駭異見已傳諭
觀音保卽將方世僞解任就近詰訊後解赴貴州質審著將原呈
及印簿交吳達善等卽行按款嚴加究訊務使水落石出此時且
不必令方世僞聞知俟將證佐人等審有確據卽一面奏請將方
世僞革職擬罪其韓極圖默愼或應解任候訊或卽應革職究審
並著吳達善等就查出情形參奏辦理所有貴州布政使印務著
吳達善酌量委員暫署附摺奏聞仍將各案見在如何查審及會
否得有確情之處卽行據實速奏○乙酉諭尙書果毅公阿里衮
久侍禁廷敷歷中外公誠恪愼宣力有年前此平定西陲懋著勞
績曾經圖像策勳是以征緬之役特命前往滇南俾膺副將軍之
任去年因其身患瘡疾遄遣御醫馳視並賜藥餌調攝旋卽向痊
而精神未能全復朕心方爲廕念昨自夏鳩進次猛拱所至頗稱

勤瘁及在新街分兵勦賊奮勇奪壘純盡足嘉乃因體弱邁疾猶統舟師前進正冀其速愈以副委任遽聞溘逝深爲軫惻所有應得卹典著該部察例具奏尋予祭葬諡襄壯○諭前經降旨令傅恆於阿桂伊勒圖二人內酌定一人補授副將軍今阿里衮見在病故軍營無人阿桂仍著在副將軍上行走其從前移給伊勒圖之印仍交阿桂管理阿里衮所遺副將軍員缺著伊勒圖補授烏三泰長青著授爲參贊大臣○諭軍機大臣等據傅恆等奏稱率領官兵占據南江上游合力攻勦賊寨等語傅恆所辦甚合機宜看來見在情形賊匪新添木寨甚爲強固我兵併力夾攻又增鑄大礮諒易克取此時若已破老官屯賊必膽裂逃竄卽乘勝前驅犁庭掃穴儻賊眾全力固守直至此旨到時仍在老官屯抗拒則已相持月餘勢難必克又何能深入阿瓦況前途瘴癘更甚我兵

恐不能支自應尋一屯駐處所或遣人往諭緬匪投誠或以已獲大捷奉旨撤兵之言宣示於眾即可籌畫旋師著傳諭傳恆等酌量辦理不可拘執○調官保爲戶部尙書以素爾訥爲刑部尙書託恩多署左都御史

原任吏部尙書

○丁亥吏部議奏升任江西巡撫吳

紹詩於災地應緩漕糧遲延具奏應照例革職得旨吳紹詩自簡任巡撫以來於地方政務未能振作有爲恐久益因循貽誤第念其尙無大過又係刑部司員出身於刑名素所諳習是以加恩用爲刑部尙書嗣因其任內不能察劾屬員之案屢經發覺是其昏毫無能已可槩見豈堪復膺劇任因調爲禮部尙書或尙可勉供職守昨於南昌等縣緩徵漕糧一事不及早入告遲至十月杪始行奏聞全不以民事爲重是以降旨交部議處災地收成歉薄小民豈能復事輸將封疆大吏如果先事陳奏朕無不立沛渥恩以

紆民力乃吳紹詩明知應緩之糧遷延不辦直待開徵將及一月始以一奏塞責是誠何心見在雖已傳諭速予停緩而該省展轉施行尙需時日是急公者納糧既不免拮据而疲窘者徒受催科之累此皆吳紹詩於閭閻生計漠不關心有以誤之也吳紹詩近日疊經部議降革並從寬予以留任此則玩視民瘼並非過屬因公實難復爲曲貸且其年亦衰老不能復望其改悔奮勉吳紹詩著照部議革任昔宋仁宗於吏部選人一坐失入人罪者卽終身不遷朕今亦倣其意以事繫民生休戚者爲督撫黜陟並爲明白宣示俾眾皆曉然於其咎實自取且使凡爲司牧者咸知儆惕○戊子諭昨以尙書公阿里衮病故已降旨察例賜卹今念阿里衮雖因邁病溘逝而見在軍營統兵前進不辭勞瘁實屬爲國宣力之人目前者平定西陲成勞懋著阿里衮著加恩入祀賢良祠以

示酬庸令典○傅恆等奏臣等於十月二十二日分兵兩翼由江岸左右攻擊賊寨臣等在中懸催趙哈國興帶兵直抵東南一面拆毀木柵丈餘殺傷甚眾西柵賊匪來援經西岸官兵擊退江心賊船乘勢衝出經東岸官兵擊損大船六隻賊眾逃入寨壘放槍固守查賊匪新立大寨五座木植縱橫編排堅固難以軍力攻取見一面仍近柵環圍一面伏兵僻處由溝外掘入拆去木椿攻其不備得旨已有旨矣諭軍機大臣等據傅恆等奏稱十一月二十二日領兵由江岸三面環圍賊壘攻奪東南木寨一處等語此次官兵接仗勇往爭先哈國興尤爲奮勉甚屬可嘉均當加恩升賞其受傷弁兵並著傅恆等查明具奏看來賊眾情形豎立柵寨驟難攻克此旨到時萬一仍相距守則環攻已有月餘賊壘之內糧石何由接應是必先有儲備矣我兵與其曠日持久多傷勇士不

如相機徐圖卽令已得老官屯亦當計出萬全阿瓦爲緬匪巢穴
固守必甚見在軍營人少奎林鄂呢濟爾噶勒等亦皆受傷尙需
調養卽令由京派人前往已屬無及若不悉心籌畫恐有疏失况
此次大兵已將曷鳩猛拱猛養等處收服軍威大振撤兵不爲無
名傳恆等於擊獲賊人內擇其明白者諭以緬匪罪重理宜全行
殲戮但大皇帝好生不忍盡殺爾等告知懺駁悔罪投誠將軍等
卽遵旨撤兵如此曉諭後將兵馬船隻籌備由新街一路分隊而
回土司渾覺興堂扎等如願內移卽擇一善地安置其所屬小戶
仍令各居本處總之辦事之道固不可輕徇眾論亦當審時度勢
勿徒執己見也著密諭傳恆等知之○庚寅以王際華爲禮部尙
書由戶部左侍郎遷○辛卯諭據傳恆等奏稱領兵圍攻老官屯十月二
十五日夜間賊從水寨突出衝我伏兵經海蘭察等擊敗復令伊

勒圖率領舟師乘勝掩襲奪取船艚等語所辦甚是但據孥獲賊
兵供稱賊船尙多船隻沿江前來顯而易見若多遣水師攔截自
易擊殺柵內之賊出援亦便勦滅此兩得之計甚關緊要著傳諭
傅恆等飭令水路兵眾留心哨探再據摺內所奏賊匪固守情形
從前孥獲生口供稱緬地內亂之言殊不可信卽將蓋拉機喚回
等情亦係有意將戛鳩委之於我以疲兵力此際傅恆等當知其
狡獪矣儻大兵深入須防賊等從後抄襲不可墮其術中○調未
邦綬爲戶部左侍郎以蔣元益爲兵部右侍郎由內閣學士遷○癸巳諭
原任大學士蔣溥宣力有年其諸子中見無身列大員之人伊次
子蔣賜榮由府道擢用山東運使看來尙堪造就著加恩補授倉
場侍郎黃登賢自署理總漕以來尙屬奮勉卽著賞授漕運總督
原任貴州布政使張達堯於劉標等揭報上司需索案內獨無沾

梁似能廉潔自守者但其年已就衰才力亦不能整飭屬員藩司
劇任自非所宜著降補山東鹽運使○諭將軍永瑞提督五福二
人前在普洱辦事不善革職後賞給三等侍衛令在軍前效力此
特子以自新之路俟其立功再行加恩今隨營前進於途次病故
殊堪憫惻並著賞給副都統銜交部照例議卹○甲午傅恆等奏
臣等率領兵弁攻取老官屯於十月三十日有賊船三十餘隻潛
至江岸構巢遂令海蘭察等領兵截剿賊俱逃竄十一月初一日
又有賊百餘名由林箐衝出經翹蘇勒接戰殺傷三十餘名臣等
酌於沿江東岸安設伏兵阻其去路於江中安排船隻截其來援
相機夾攻得旨應如是辦理但汝極爲勞乏兵丁皆好否○乙未
福建水師提督葉相德在軍營病卒贈太子少保入祀旌勇祠賞
銀一千兩治喪子祭葬諡壯果○丙申傅恆等奏臣等進攻老官

屯日夜電勉急圖成功見在賊情不過藉木棚爲固守計若分兵前取木梳猛密等處賊必接應再繞後來攻自當易克奈因本年瘴癘過甚交冬未減原派各營兵三萬名滿兵一千名見計僅存一萬三千餘名加以領隊大臣亦多患病未能分路擊取賊匪得以全力自固得旨以此觀之撤兵爲是早已降旨矣論軍機大臣等昨傳恆等以攻擊老官屯情形具奏已節次降旨令其籌畫萬全儻勢難前進卽乘時撤兵及聞今日奏到摺內見居冬令瘴氣未消葉相德等皆染病身亡緬地氣候惡劣徒傷人眾斷難深入傳恆等當卽遵前旨辦理老官屯旣不可久駐野牛壩地方尙高酌量於該處留兵屯守並著土司等於關外相度地勢駐紮防範令其以暫時退駐明年再行進兵之言宣示於眾諒賊等必不敢來犯此內惟猛拱土司渾覺我兵一到卽行投順理宜內徙安插

伊若不願聽其自便著傳諭傳恆將善後事宜交阿桂籌辦卽速馳驛來京○戊戌諭揀選一等二等武進士引見著爲令○傳恆奏臣自到永昌以來察看阿桂諸事黽勉前在野牛壩催趲船隻頗爲竭力其所過新街蠻暮一帶已被緬匪蹂躪糧石無可掠取老官屯賊去歲卽知大兵前進立柵防守蘇明燦到時阿桂僅領兵三千餘名卽使前往未必能克尙非坐失事機見在軍營賴其協助副將軍印務仍暫令阿桂辦理候旨定奪得旨可已降旨矣○己亥以託恩多爲西陵總管內務府大臣起觀保署左都御史原任禮部尚書○庚子諭據吳達善等奏查審威甯州知州劉標虧缺銅本鉛運及永泰揭報高積等勒索劉標一案請將按察使高積等革職審擬等語高積圖默愼韓極俱著革職交與吳達善等嚴審定擬具奏方世儒亦著解任押解黔省聽候質審○諭孫孝愉

在福建按察使任內官犯蔡琛在監自縊情節可疑孫孝愉與蔡琛同在刑部年久明係賄徇舊情洩漏消息是以降旨將伊革職發往軍臺效力贖罪並諭崔應階查審蔡琛因何自縊緣由昨據該督覆奏蔡琛問擬重辟後係伊家人進監探望通信以致畏罪自戕等語是孫孝愉尙無差人通信之事其罪尙可原減臬司職任刑名監獄是其專責乃一任重犯家人潛行出入通信徇情疏縱之咎實所難辭孫孝愉前爲刑部司員尙能辦事著加恩免其坐臺令來京仍以刑部主事用○諭軍機大臣等本日閱興漢鎮總兵張大經奏函於恭祝 皇太后萬壽摺外又有恭請 聖安摺一件殊與體制未協而近日督撫提鎮中亦頗有似此者 皇太后萬壽聖節普天同慶凡屬臣工自應具摺恭祝以伸誠悃至於奏請 聖安則非伊等分所應爾向來惟 皇太后回鑾時在

京王公滿漢大臣等有同赴 宮門請 安之事其內廷行走大臣及內務府大臣奉差回京者亦許趨詣請 安若督撫將軍陛見來京尙不敢率行奏請况總兵乎嗣後督撫等遇拜發恭祝皇太后萬壽摺不得另具請 安奏摺著於奏事之便通行傳諭知之並令轉傳各該省應行具摺大員一體遵照○甲辰諭副都統瑚爾起副都統銜總兵阿第木保前在軍營著有勞績此次收取猛養等處亦甚奮勉今皆病故殊堪憫惻著交部照陣亡例議卹○諭軍機大臣等據阿桂奏稱傅恆身染瘴癘見患腹泄頗形羸弱等語此次進剿緬匪事難中止從前軍營大臣等並未將實在情形明白具奏及傅恆請往朕早謂地方險峻氣候惡劣究竟可辦與否須到彼詳加審度復以事機難定於今歲祈穀時默祝昊蒼若此事必難辦理則傅恆患病卽不復舉兵前已諭知傅

恆及軍機大臣矣乃傳恆至騰越一路無恙收服猛拱猛養等處並在新街蠻暮屢獲大捷是以令其前進及至老官屯水土毒惡日夜攻取積勞成疾今未就痊此卽上蒼垂示無庸深入之意也且官兵俱不耐瘴癘伊等皆朕之臣僕心實不忍且以緬賊故而致多損傷亦屬不值此旨到時傳恆卽馳驛來京留阿桂在彼籌畫撤兵先於歸路兩旁設伏防其後襲隨將吉林索倫厄魯特兵編隊前行其餘於野牛壩地方酌量暫駐所有船隻或卽燒毀或尋一妥處安放彰寶想已到老官屯著傳諭阿桂卽會同彰寶辦理○丁未諭何焯奏截取知縣之舉人徐廷槐人甚衰弱難膺民社不敢因已經截取濫行送部應請改用教職等語所奏甚是各省舉人截取屆期督撫等不過循照舊例槩行送部從未將年力衰邁之員甄別具奏何焯乃能於驗看之時據實奏聞具見其

實心任事但此等人員需次有年或自忘其衰老不甘廢棄若卽據奏改教伊等必謂督撫任意遏抑阻其上進之路轉不足以服其心嗣後督撫驗看截取舉人如有衰庸難膺民社者卽著照此陳奏其有自不服老情願引見之人著該督撫照大計六法官例送部引見候朕臨時定奪著爲令徐廷槐卽照此例行○諭據經略大學士傅恆等奏總兵德福攻打賊寨勇往爭先受傷陣亡等語德福身先士卒奮勇捐軀深爲軫惻著入祀旌勇祠所有應得卹典仍著該部察例具奏○傅恆等奏大兵圍攻老官屯賊勢窘迫賊目諾爾塔致書懇乞解圍經臣等傳諭訓飭嗣又遣小頭目節級齎呈情駁書函籲請停兵詞頗恭順諾爾塔復謁見哈國興叩求回書臣等察其情詞似非狡詐遂繕書曉諭令其具表求降送出內地被留之人其投誠土司嗣後不得侵擾若能悉遵約束

卽當奏請撤兵付書遣去得旨知道了另有旨諭傅恆又奏臣自抵騰越以來領兵前進惟期迅奏膚功詎意夏鳩渡江後官兵多苦瘴癘臣到老官屯卽患腹泄至今未痊誠恐有誤國事更念此次用兵眾以爲難獨臣執意請行致負委任應請從重治罪得旨另有旨諭○諭緬甸僻在炎荒不足齒數自來潛蹤廢臂從不敢侵軼邊界而中朝亦惟以化外置之乃歷任總督自張允隨卽已廢弛邊備不能整飭營務嗣是愛必達吳達善等亦因循不振致緬匪易視內地綠營與沿邊土司漸滋事釁而劉藻辦理莽匪侵擾九龍江一事旣已畏葸無能由思茅退回普洱輒行畏懼自戕緬匪遂爾鴟張無忌此歷來貽誤情形也至命楊應琚往彼接辦調度乖方致賊匪闖入關內騷擾土司雖釁端不由伊肇而其種種欺謾屢飭不悛其取罪實在於此及再命明瑞前往仍令以總

督經理邊情並未遽欲興師遠涉而所統八旗勁旅不過二千且
又分其半與額勒登額由旱塔一路取道合勒迨明瑞自錫箔蠻
結拔寨殺賊乘勝深入轉戰至小猛育爲時已久屢促額勒登額
移兵往援乃敢抗延不赴又復紆回內地明瑞等猶沿途接仗力
期殿護全師竟以策應不前捐軀以殉其事遂難中輟彼時緬酋
懼駭雖曾具書軍營懇停進剿而所遣乃內地被留之兵丁許爾
功等數人並未專派大頭目齋表乞降此則國體所關豈宜輕納
是以置之不答然猶冀其悔罪輸誠果能請命如禮尙可宥其旣
往並非必欲勞師動眾爲犁庭掃穴計也詎待至一載逆酋仍頑
梗怙終而我國家當全盛之時豈可任小醜跳梁竟不示之懲創
況滇省綠營恒怯積習久爲賊匪所輕而阿里衮阿桂在彼亦未
能相機部署是以調遣吉林索倫等慣能殺賊之人並閩省水師

同赴滇省水陸夾攻又因大學士傅恆屢請前往督辦情既懇至
誼亦難辭且其實心體國經畫有方至彼體察形勢所言始爲可
信遂命爲經略往莅其事朕不得已用兵之苦心屢經籌議不特
軍機大臣聞之至熟卽王大臣等亦嘗諄諭及之也至傅恆於七
月閒自騰越進兵視前此師期較早兩月賊匪未及豫爲防備因
得由戛鳩一路統兵直進收取猛拱猛養而其所經山徑崎嶇江
河紆阻越險濟軍備嘗勞瘁且因敵刈糧不藉內地轉饟及至新
街會兵策勵將士無不買勇爭先於江岸沙洲已連奪賊砦殲賊
五百餘並殲其頭目獲取舟航器械賊皆望風披靡如此殫誠宣
力不畏艱阻實從來領兵大臣所罕觀者及進次老官屯率眾攻
勦而賊人守拒甚固猝未能下遂克彼屯西一寨誅戮賊眾絕其
糧援復悉力圍其大寨勢可計日而取但其地水土惡劣官兵在

彼多生疾病卽領隊大員亦閒有染患身故者見今冬令瘴退之後屯駐尙不相宜則當陽生春至以後雖得老官屯不可以深入明矣且將士等爲國抒誠效力義應不避鋒鏑若對敵畏卻不前尙當治以軍法其能殺敵致果者雖歿於行陣朝廷自有優卹之典卽伊等亦安於分誼所當然顧以我勇敢士卒不用之於戰陣而徒令其嘗試毒癘於心實有所不忍前經傅恆等節次奏到朕以國威固不可不伸而疊經奪砦擒賊殄彼渠兇亦旣奮揚我武况瘴鄉絕徼氣候與內地迥殊我兵之不宜久留彼土實屬地勢所限非兵力不足軍儲不充也朕籌辦軍國重務一切惟順天而行今審時度勢自當知難而退不宜復執直抵阿瓦之說是以於半月前卽疊傳諭旨決計撤兵惟諭傅恆等將善後事宜妥協經畫實朕熟思審處久定於中者今據傅恆等奏緬酋懽駁奉有蒲

葉書遣老官屯大項目諾爾塔齊詣軍門願請貸其聲討傅恆等
移檄使受約束義正詞嚴前旣諄諭撤兵此時自應姑從所請以
完此局在么膺醜類反覆不常原難保其經久馴服但賊眾甫經
創鉅諒不能遽萌故智卽或遲至數十年後復有蠢動自可隨時
措辦以靖邊圉因以原摺令王大臣等閱看任眾人未嘗不以此舉
此事爲機會適合或有喜動顏色者而朕實覺不然若竟以此舉
遽爲忻幸則與眾人之見何異至傅恆另奏請罪一摺若僅以攻
寨未能迅克爲歉則阿桂亦同時任咎尙爲近理乃以爲力還眾
議執意請行將此次出兵引爲一人之罪殊爲未喻朕意此次出
兵原屬萬不得已並非好大喜功而傅恆承命經略職分應爾設
以爲辦理非是朕當首任其過其次方及傅恆豈宜獨以爲己責
昔我皇祖於吳三桂一事諭令廷臣集議眾議僉以爲不可

遷移而主撤藩者惟米思翰明珠數人後逆藩抗命眾皆歸罪議
撤之人甚有以請誅之說進者 皇祖深闕其非宣 諭云朕自
少時以三藩勢燄日熾不可不撤豈因吳三桂反叛遂諉過於人
大哉 聖言足爲萬世法守朕惟仰紹 祖訓奉爲權衡傅恆此
事卽可援以爲例前於傅恆收服猛拱時曾賜三眼孔雀翎以示
褒寵傅恆卽具摺懇俟功成後再行戴用今旣未經攻克賊巢前
所賜翎卽著繳回仍用伊原戴之翎卽此與伊請罪之意適足相
當想王大臣等亦當誠心允服將此宣諭中外並將原摺譯漢發
鈔所有撤兵各事宜著傅恆悉心妥議具奏○諭軍機大臣等據
傅恆等奏稱懽駁遣人呈書並諾爾塔叩見哈國興額請撤兵解
圍等語前因緬地水土毒惡官兵不耐瘴氣曾經降旨撤兵今懽
駁又遣使乞降自應照所請辦理但此後須定規模不可令緬酋

驕縱卽如書內懇求通商一事尙應斟酌情駁如願爲臣僕納貢
輸誠則緬地皆我版籍貿易無妨相通儻止求撤兵未請納貢通
商斷不可行著傳諭傳恆等卽將此旨明白曉諭再嚴禁內地商
販不得出關交易

十二月己酉朔諭朕尊養 璇闈展愛承 歡一切務臻隆備前
者每逢 慶典加上 聖母皇太后徽號悉遵會典成規敬製金
冊金寶以爲準儀昭度程式宜然近檢稽體仁閣尊藏法物則
孝莊文皇后玉冊玉寶具存皆康熙年間 皇祖歷次加奉 太
皇太后徽號所進者乃知冊寶原有刻玉之制因思國家 傳寶
質皆琢玉而下逮親藩封爵冊寶亦得范金是嘉玉較視良金尤
爲寶貴越歲辛卯恭遇 聖母八旬萬壽朕將躬率羣臣恭加
徽號用治彝章所奉冊寶自宜備極珍崇以稱朕尊 親茂慶之

志著大學士會同該部博稽舊典敬謹詳議以聞尋議奏臣等謹
按歷代崇奉母儀皆以宮稱至宋始隆尊號並有加上冊寶之文
考其制度刻玉與范金互用惟宋仁宗天聖二年上皇太后應元
崇德仁壽慈聖之號用玉冊琮寶哲宗元祐以後凡崇上徽稱皆
如天聖故事元元統二年上皇太后玉冊寶明史詳於儀注而制
度不詳蓋自昔典章互有異同而冊寶用玉其禮特重宋樂志所
云寶鏤精瑤冊鐫華玉物盛禮崇丕昭羣目是也我朝禮教修明
尊奉 慈徽超軼往古 聖祖仁皇帝加奉 太皇太后徽號恭
奉玉冊玉寶大內珍藏萬世爲憲 皇上尊崇 聖母頻上 徽
稱 躬進冊寶制因會典質以黃金固已尊養兼隆禮文具舉茲
者上稽法物聿繩 祖武詔以辛卯之歲恭逢 聖母八旬萬壽
普天抃舞敬奉冊寶嘉玉爲宜備極珍崇用彰盛典臣等伏考周

官曰王者晉大圭大圭一名珽左氏春秋以爲昭其度也又曰天子執冒四寸以朝諸侯鄭氏云名玉曰冒者言德能覆蓋天下也禮記曰圭璋特達德也天下莫不貴者道也以天下之至貴奉特重之典制是以尊揚懿美宣示隆文載命工倕敬書鴻號琢球琳之美質發圭璧之光華繇景福於無疆紀徽音而有慶較之錯采鏤金愈益欽其貴重華美者也矧今聖化覃敷琛寶畢集闕河崑崙之珍上貢闕廷用以恭製冊寶衆功昭德奉進璇宮璽天章之巍煥昭慈教之恢宏信所謂合中外以尊親受共球而歸善自古帝王未有倫比臣等遵旨謹議此次恭奉皇太后冊寶皆用嘉玉以隆慶典所有一應制度及冊匣寶蓋應行製造事宜俟命下之日交該衙門敬謹辦理從之○庚戌以陸宗楷爲內閣學士

原任禮部尚書

○辛亥諭據楊廷璋奏

淀河神宇告竣

請奉 皇太后安輿拈香祝釐一摺天津近依輦轂朕前此親臨
巡視經理淀河工程俾得永資樂利復以 神庥昭應歲稔安瀾
敕建 淀神祠宇用答嘉貺該督既稱茲當輪奐維新之候喜值
普天同慶之辰畿輔輿情願切瞻就自宜俯從所請於明春掖
輦承 歡祝延瞻禮以慰蒸黎望幸之忱明年爲朕六旬慶節敬
當展謁 東陵 西陵禮成旋蹕正屆春和卽敬奉 慈輿諏吉
前往該督其飭所屬一切務從儉約毋事增飾繁文副朕行慶省
方嘉惠旬民之至意所有應行豫備事宜著各該衙門照例豫備
○以降旨撤兵免雲南辦理軍需地方及永昌等三府州明年額
賦十分之五直隸河南湖北湖南貴州等省官兵經過各州縣並
免十分之三○調宮兆麟爲湖南巡撫以陳輝祖爲廣西巡撫調
姚成烈爲江甯布政使以薩載爲江蘇布政使

由蘇州
織造還

○以德保

爲廣東巡撫

由吏部
侍郎選

○壬子諭據傅恆奏滇省水師船隻用日無

多卽有損壞再四思維於心實覺難安請將用過物料價值及匠
工人等所支各項查明賠補等語所奏不可行此次進剿緬匪兼
用舟師乃出自朕意並非傅恆一人倡議承辦且伊於造船一節
任勞任怨始能剋期集事至船身大小尺寸與江路不能適合原
非可以豫料若因此遽行引咎自認賠補揆之事理旣未允協而
將來遇有國家公事大臣等誰復肯一力擔承辦理乎傅恆所請
賠補船隻之處竟可無庸置論並將此諭眾知之○諭軍機大臣
等據傅恆等奏緬酋得祿萬遣人到營請安並請出寨相見等情
得祿萬輸誠求見經哈國興明白曉諭情願納貢所辦甚爲得體
此次哈國興諸事奮勉坐辦一切似更優於長青是以將伊調補
雲南提督已另降諭旨矣再摺內奏稱頒給渾覺印信暫未交付

等語渾覺首先內附願爲臣僕故特鑄給印信應卽頒發仍問其情願內移與否妥爲安置至興堂扎裏懇解象來京不過瞻覲邀恩之意著准其前來到京後再降諭旨○軍機大臣等奏查汲古閣刻十三經十七史唐詩鼓吹吳偉業梅村集王士正漁洋集等書均有錢謙益序文應請撤去得旨知道了其經史及諸集內所有錢謙益序文語無悖謬者俱不必撤毀○癸丑諭前因阿思哈於軍務尙爲諳習特用爲雲貴總督乃甫到蠻暮卽以辦理糧馬竭蹶爲辭顯係心存畏怯豫爲諉卸地步封疆大臣身任軍行重務如果於邊外情形確有所見自應將其風土事宜妥籌全局詳悉入告方爲合理而阿思哈當大軍鼓勇進剿之初遽以動出萬難搖惑眾心豈臣子仔肩軍旅重任之義是以將伊革職留於軍營效力贖罪今已降旨撤兵阿思哈在滇無事且覈其前此所奏

雖意存取巧而其言尙不甚失實阿思哈著加恩令其來京補授
吏部侍郎仍帶革職留任以觀後效○諭據楊廷璋奏驗看推升
遊擊之靜海營都司蘇璋精力衰老弓馬不堪不特不宜升任遊
擊並難勝都司之任請旨勒休等語所奏甚是各督撫驗看推升
武弁其中卽有年力衰頹不能勝任者往往以已經升用心存姑
息槩行送部楊廷璋乃能於驗看之時據實奏聞具見其實心任
事昨經何焞奏將截取舉人徐廷槐改用教職一摺曾降旨允行
並令各督撫詢明其中如有自不服老不甘廢棄者卽照大計六
法官例送部引見候朕定奪以服其心嗣後督撫驗看推升武弁
亦照彼畫一辦理著爲令蘇璋卽著該督遵例行○乙卯諭據傳
恆奏護軍統領烏三泰在軍營病故烏三泰白到滇以後臨陣勦
賊甚爲奮勇從前造辦船隻亦頗得力今聞溘逝殊堪憫惻著加

恩交部照伊柱例議卹○傅恆等奏大兵圍攻老官屯緬匪惜駁遣人致書懇求罷兵情願繕具表文十年進貢一次茲差頭目二人呈送洋錦呢布等物臣等堅卻不受經頭目等率眾一百八十餘人負荷陳設營門再四懇求卽飭令接受將魚鹽菜蔬等物分犒軍士紬段銀牌分賞夷眾並令哈國興諭以納貢時表文須遵各外藩體例應恭繕具書緬甸國王臣某奉表 大皇帝陛下以昭規制該頭目卽書寫存記察其言詞似無欺飾諭軍機大臣等據傅恆等奏稱緬酋惜駁遣人到軍營齎送錦布等物並見哈國興當卽諭以表文規制等語所辦甚是前此惜駁懇求通商曾經降旨傳諭傅恆不允所請今旣願奉表稱臣輸誠納貢通商自應可行但此時且不必曉諭俟其來京時再降恩旨著傳諭傅恆等知之○丙辰諭據永貴舒赫德等奏稱審明雅爾牧場盜馬一案

請將巴爾品等分別治罪並令卓勒齊將圖伯特帶回哈薩克辦理等語圖伯特雖未經盜馬從前在禁脫逃究屬有罪應行責懲乃僅交卓勒齊帶回辦理未免姑息舒赫德著嚴行申飭巴爾品於此案顛預了事甚屬不堪著發往伊犁枷號示眾扎隆阿扶同巴爾品草率完案著交部嚴加議處永貴查出實情不卽具奏亦係瞻徇著交部議處尋議扎隆阿應照例革職永貴應照例降三級調用得旨扎隆阿著革去副都統職銜仍留塔爾巴哈台自備資斧效力贖罪永貴著降三級調用○丁巳以袁守侗爲吏部左侍郎由太僕寺卿遷○甲子命裁雲南各鎮冗缺○乙丑諭歐陽永禱奏大計才力不及之員例應降調請將科目出身之知縣槩以教職降調一摺所奏甚屬非是大計爲激揚鉅典所以飭吏治而示創懲六法官各有應得處分定例遵行已久豈容輕議更張至才力

不及之員必因其闕茸無能始行糾劾降補佐雜已屬優容又何得妄爲區別况由科目銓授之人或平日尙無大過僅止不勝民社者各督撫久經隨時奏請改教安能留待弊吏之時則此時列入不及之員並不堪司鐸明矣且計典被劾者例俱送部引見候朕定奪施行該上司從不能稍有屈抑而此輩庸碌者流當官既不能舉職卽爲國家無用之人科目與他途何異况黜陟乃朝廷馭下之柄卽大僚貶居末秩尙不敢違顧於科甲出身之縣令竟不屑以丞簿卑棲公然與成憲相抗紀綱尙安在乎聞歐陽永琦前在河南鹽驛道任內舉發朱若東等私得鹽規一案外人有議其刻覈者其實係伊分所應辦伊必因前事不愜人意欲以此舉博收名譽冀爲掩蓋所見已非公正且伊身任藩司考績是其專責乃當舉行計典之時敢爲此奏陽託量材授職之名陰施分途

擇官之計明係袒徇科目取悅庸流實屬有心取巧明季科目官
官相護甚至分門植黨僨事誤公惡習牢不可破乃朕所深惡而
痛斥者方欲悉力屏除豈肯聽以此等伎倆巧爲嘗試乎歐陽永
禱著交部嚴加議處○副都統公豐安於撤兵後病卒命照軍營
病故例議卹○傅恆等奏於十月二十六日至虎踞關暫駐地方
雖覺寬闊霧氣甚大官兵仍不能勝因思旣已撤兵不若前至騰
越永昌一帶駐紮可省內地運糧之力但兵俱全退將來懽駁納
貢至關無人駐守不足示威遂令馬彪雅爾江阿領兵一千五百
名在虎踞關暫駐馬得勝領兵一千名在蓋達暫駐孫爾貴領兵
一千五百名在遮放暫駐其餘滿洲吉林錫伯索倫厄魯特兵分
隊前行各緣營兵亦隨後續退此內惟成都福建兵出派日久卽
令各回原省餘俟到永昌另籌具奏報聞又奏臣等行至虎踞關

有緬子頭目得楞覺蘇蓋答角蘇帶六十餘人前來請安據稱探問守關大人確係何人以便進貢時經由關口求其指示道路等語遂令叩見馬彪雅爾江阿並酌給賞資察其情詞實覺喜出望外得旨覽○丙寅諭軍機大臣等今日召見各省陸見將軍副都統等問及官兵因公出差借貸官項有動用馬價者有豫先扣存俸餉臨時借給者官兵借項動用存公銀兩尙屬可行若豫扣俸餉不惟有損伊等生計且亦不成事體著通行傳諭各省將軍副都統嗣後一切差務須少派官兵以惜其力其有緊要差使應須借貸官項者除紅白賞銀外另籌款項備給不得扣存俸餉○丁卯諭軍機大臣等滇省見已撤兵一切善後事宜自應及此時熟籌妥辦所有裁汰總兵一節昨已諭令傅恆等會同彰寶卽行查辦因思滇省不特營餉應議裁併卽知府一項額缺亦多冗設有

一府不過一兩屬者甚至有竟無屬邑者數其所治尙不及腹內一劇縣之大而寄以知府專城殊非體要蓋由從前鄂爾泰辦理雲南邊務時意在張大其事而未加覈實於地方事務毫無裨益自當就各府情形量爲改併裁減以重官制而專職守至與緬夷貿易一事前已有旨如果該酋奉表稱臣誠心歸順尙可俯從所請但商民貨販出入諸事亦當豫定章程前此邊務廢弛聽商民往來自便致多流弊今若准其交易自應酌定會集之時並於新街等處指定地面至期選派文職同知武職守備各一員酌帶兵役數十名前往稽察彈壓事畢督令商民卽回內地毋許逗遛滋事其非交易之時各邊隘仍嚴禁奸民偷越方爲兩得再如永昌邊外茂隆廠銀礦向有內地民人赴彼開挖之事其地距關口寫遠稽察有所難周伊等恃無檢制與擺夷等雜處牟利奸弊潛生

緬地漢奸大率不過奸商及礦丁兩種自當設法嚴禁以清其源此等諒皆遊手無賴之徒竊棲異域止圖自贍其身罔顧利害甚且漏洩內地事情實爲沿邊蠹病設邊內良善貧民亦有資此爲生計之處似又未便一例禁防但滇省自用兵以來邊禁旣嚴編氓自不能輕出伊等連年日用之需又何所賴務須查明實在情形如果滇民有必資贍給之處則當另籌妥辦否則竟宜永遠禁止庶淨葛藤至普洱邊外十三板納向俱歸附自經莽匪滋擾竟有爲彼侵占者伊等見在是否仍隸內地能否無誤耕作照常納課否又雅耶阿近復有招降者應作何辦理前曾傳諭傅恆於平定緬匪後交阿桂由來卡一路前往就近查辦今旣已撤兵此事亦應籌及但阿桂不能復由彼路則普洱一帶又當另派能事大員往彼清理並使沿邊各土司永得安居樂業又前據傅恆奏附

近永昌騰越入土司經緬匪擾害以後戶口凋零俟軍務告竣設法招徠善爲撫輯等語想傅恆等此時自己妥議及此著亦入於善後事宜款內一併酌辦奏聞至今秋進兵征勦時恐逆酋窮蹙竄匿南掌暹羅等處會諭傅恆檄知南掌國王協力邀截擒拏其暹羅因係甘恩款竊據未經檄諭而李侍堯則曾奏明就便檄示河仙鎮目莫士麟一體防緝今旣撤兵竣事應將緬人屢次遣大頭目至營籲乞投誠情詞恭順已經奏聞俞允經略等已班師情事諭知南掌國王以完此局其河仙鎮目莫士麟另諭李侍堯照此檄示矣以上各條皆朕日來偶然籌憶所及不可不妥善經理因詳晰諭令知悉此外如尙有相類之事亦須此時措辦者著傅恆等與彭寶再四熟思悉行酌定毋致稍有挂漏計傅恆行程此時應過永昌接奉此旨不必復費往返卽著阿桂彭寶馳就傅恆

會同妥議覆奏拜摺後傳恆仍緩程回京阿桂等再赴永昌等處商辦回兵諸事將此一併傳諭知之○己巳 上以來年春月奉

皇太后謁

東陵巡幸天津免經過地方及天津府屬三十五

年應徵額賦十分之三○以阿桂爲禮部尙書阿桂在軍營以素

爾訥兼署○壬申軍機大臣等會議大學士陳宏謀奏請停辦洋

銅一摺查洋商每年承辦銅九十八萬餘斤合之歲產滇銅分解

京局各省以供鼓鑄若將洋銅全行停辦分撥必致不敷其所慮

商人居奇之說尙係當日情形見在各商承辦俱無缺誤自可毋

庸另議至奏稱廠夫係食力之民必須豫發工本以資採辦等語

應如所請仍令該撫飭所屬銅廠實成課長出結按期交納逾限

勒追如有虧缺令該管廠員及課長分賠從之又議調任浙江巡

撫永德奏覆籌議浙局停辦滇銅一摺查滇省各廠每年產銅一

千三百餘萬斤供應京局及各省配鑄共須銅一千二百餘萬斤
原屬有餘向因經理不善積成虧欠見在奉旨整飭自不致有誤
採買該撫因一時銅運未到遽請停辦並於搭放一成兵餉內減
半放給頓改鑄額有礙錢法至所稱洋商四分民銅扣繳二分等
語查各商聽留四分民銅前經戶部奏准令其於此項銅內分年
兌交代完欠項該商所餘無幾未便再令扣繳均無庸議從之○
癸酉諭前經降旨令方世儁解任押解黔省審訊今據吳達善等
奏稱方世儁得受劉標銀一千兩已據伊家人李四供認不諱請
將方世儁革職嚴審又劉標之子劉飛熊係捐納通判職銜在署
經管帳目應行細加根究並請革審等語方世儁著革職劉飛熊
革去職銜交與吳達善等一併嚴審定擬具奏○諭軍機大臣等
昨據永德奏請浙省停辦滇銅而大學士陳宏謀又有請停洋銅

之奏二說俱未允協已經軍機大臣會同戶部議駁矣至陳宏謀奏豫發工價一節意欲援爲厯來銅廠虧缺解免所見非是但慮及該督撫等或有懲於前事不肯照常豫發則辦銅必須周章自爲近理已據議覆允行矣雲貴兩省辦理銅鉛節年多有虧短遲誤之處皆由經管大員等經理不善如滇省道員羅源浩並不力爲清理以致積欠纍纍是以將伊革職追賠治罪又有黔省之知州劉標甚至從中侵蝕並有該土司需索分肥之事見在革審究治經此番懲創之後督撫等當董率司道及專管之員力爲整頓勿令復蹈前轍自可使積弊一清至廠夫採辦銅鉛若不豫給工價一切皆無所資勢難責其墊辦設或該督撫等存畏首畏尾之見慮及日後干連賠累不肯照前豫發所謂因噎廢食於銅務實屬有礙著傳諭該督撫嗣後應給工價時仍行豫發但須按期追

令完繳以清年款毋任屬員拖延至向來遲緩之故亦由廠員督飭不前乃往往藉口於雇覓夫馬艱難及米食燈油不能充裕多方委卸其意未免以爲近年承辦軍需不能兼顧銅鉛缺誤其來已久前此未辦軍務之時又將何辭以解著該督撫等悉心妥協籌辦務令各項供用無乏俾銅鉛皆得源源接運以濟京局及各省鼓鑄如仍奉行不力稍有稽延虧少惟承管之督撫司道是問將此切諭知之○諭承德奏浙局銅斤一摺交軍機大臣會同該部議奏所駁甚是已降旨依議矣浙省錢局需銅向係滇洋並辦以一成錢搭放兵餉相沿已久昨因滇省運銅稍遲恐不能如期供鑄諭令將能否添辦洋銅以省滇運之處悉力籌議該撫既知洋銅之難以添購卽應就實在情形據實籌畫奏聞乃欲於洋商四分民銅內扣繳二分以濟鼓鑄所增既屬無多遽請停辦滇銅

減半放餉是於銅務錢法均覺有礙殊爲不曉事體永德著傳旨申飭該撫見已調任江蘇江省事務殷繁較浙省尤爲難辦伊如此糊塗冒昧率是以往恐劇要之任非所能勝深爲彼慮之新任藩司薩載在蘇年久人亦明白能事臬司吳壇平日諸習刑名二人皆可相助爲理永德遇有一切事務當與兩司悉心講論妥協經理庶不致貽誤地方設自逞臆見不能虛衷集益致公事稍有舛誤則是不能承受朕恩矣並將此詳切傳諭知之○乙亥諭獻歲爲朕六十慶辰元旦筵宴羣臣用昭愷惠定例惟宗室王公及大臣中之指定班次者得入殿與朝正外藩按序就宴其一二品大臣均在丹陛列席令式相沿已久第思大學士尙書階秩較優與丹陛羣工聯齒齒坐尙於體制未協所有元旦太和殿筵宴大學士尙書俱著各依班次列坐殿內以示洽禮辨儀至意著爲令

○諭據喀爾喀奏盤查司庫雜項銀兩有前撫良卿長支本年冬季養廉銀九百九十餘兩係原任布政使張逢堯經放請將張逢堯交部嚴加議處其良卿豫支銀兩並於張逢堯名下勒令追賠再張逢堯進京陛見亦曾借支養廉銀九百三十餘兩見在移咨追解又良卿尙有豫支三十五年春季養廉銀八百兩高積署布政使時長支養廉銀七百八十餘兩皆係高積經放歸於審案著追等語各省養廉例應按季支放今黔省既有透支之事恐他省似此者亦所不免著再申諭各督撫藩司嗣後無論大小等官養廉一槩不准透支其藩司自支養廉並將支用日期報明督撫存案如有故違豫支者該督撫卽行參究追賠如督撫徇隱不奏及自行濫支者一經發覺將督撫藩司一併從重治罪至張逢堯身爲藩司乃於良卿豫支養廉徇情透給且於起身時自行豫借養

廉均屬違例張逢堯著交部嚴加議處所有伊經放之良卿豫支
養廉及伊借支養廉共一千九百二十餘兩均著落張逢堯名下
十倍賠繳以示懲儆○傳恆等奏臣等遵旨詢問土司渾覺情願
內移與否據稱蒙 大皇帝天恩原欲在內居住但家口俱在猛
拱且所有屬下地方亦須前往管束仍願回至猛拱爲邊外土司
等語遂酌量賞給送回令其就近出萬仞關並一面移文緬甸嗣
後不得滋擾得旨覽○是歲朝鮮來貢○會計天下民穀數各省
通共大小男婦二萬一千二百二萬三千四十二名口各省通共
存倉米穀三千七百五十七萬九千七百三石五斗五合三勺